

程



西江志卷第九十三

人物二十八

南安府

唐

謝肇字景初上猶人閑武藝與父率兵征蠻功第一除朗州  
刺史會寇起汀建命舉兵掩之一出而平遷百勝軍防禦  
使粵閩卒叛復提兵勦平下詔褒美授金紫光祿大夫檢  
校戶部尚書

林志

按寰宇記唐南康縣地偽吳天祐中析置上猶場南唐  
始改場為縣謝肇在唐時未可遽稱上猶人今姑仍舊  
志

後五代

西江志

卷九十三人物





黃玉

一作黃廷玉

上猶人天祐中補使院尋署上猶場民德其保障累功二十四考有司上其狀於南唐授銀青光祿大夫壽九十七而終豫章書

盧光稠譚全播皆南康人光稠狀貌雄偉無他材能全播勇敢有畧然全播常奇光稠為人唐末群盜起南方全播謂光稠曰天下洶洶此真吾等之時無徒守此貧賤為也乃相與聚兵眾推全播為主全播曰諸君若欲成功當得良帥盧公堂堂真君等主也眾諾之乃立光稠為帥時王潮攻陷嶺南全播攻潮取其虔韶二州光稠又遣弟光睦攻潮州光睦好勇而輕進全播度其必敗乃為奇兵伏歸路光睦果敗走潮人追之全播以伏兵邀擊遂取潮州是時劉巖起南海擊走光睦以兵數萬來攻虔州光稠懼全播

曰吾知劉巖易與爾乃選壯士伏山谷中佯治戰地於城南告巖戰期以老弱五千出戰戰酣偽北巖急追之伏發巖遂大敗第功全播悉推諸將梁初江南嶺表為吳與南漢分據光稠獨以虔韶二州請命於京師願輸貢賦太祖為置百勝軍以光稠為防禦使又建鎮南軍以為留後光稠病以符印屬全播全播不受光稠卒立其子延昌而事之延昌好遊獵其將黎求閉門拒延昌延昌見殺求乃自立請命於梁拜為防禦使求暴病死州人相率詣全播第叩門請之全播乃遣使請命於梁拜防禦使治虔七年有善政楊演遣劉信攻破虔州以全播歸廣陵卒年八十五

五代史

按盧光稠人物志一載贛州又載南安林志止載光稠



而不及譚全播今據史傳改補

宋

謝茂希肇之裔建隆初以武藝顯官至銀青光祿大夫檢校

右散騎常侍兼御史大夫

明一統志

劉元亨字子嘉南康人開寶中入白鹿洞修進士業江南國

學廢例選赴闕以學行老成為後輩推重復還鄉道過廬

陵郡守聞其名薦應舉登咸平二年第

林志

田闢南康人天資篤實嗜學不倦游上庠二十年無所成浩

然歸隱號大隱居士九子各授一經登第及特恩者七人

時稱義方者歸田氏

明一統志

謝允昌字季孫上猶人肇之裔熙寧間以太學生上書召對

賜進士出身以言忤執政倅曲江有惠利及民司馬光薦

為大理丞不赴遂致仕

林志

利申字仲通大庾人元豐間士務為新學申遂不應試遊江

都有廣陵集廬陵郭勁序之謂其放得於太白其易得於

樂天其蹇得於聲叟其嚴得於昌黎云

同上

何大正字自中大庾人博通諸經尤邃於易元祐間升國學

諸儒推許官南雄州司理有愛惠致仕卒

人物志

田如鼇闢弟宣和進士丞相呂頤浩一見器重之高宗召問

江右盜賊對曰小寇不足慮所憂者西北耳累官監察御

史出知道州民樂其豈弟後加直秘閣京西轉運副使昆

弟如鵠如鵬如鴻俱登進士第

明一統志

按田如鼇人物志以為闢之第三子與一統志不合

蔡居中字正中南康人好學不倦宣和間入太學政和中謁



主文霍端友侍郎以其文擬冠多士同列有持他卷曰波  
瀾老成當為第一即張綱也居中次之仕終宗正丞

林志

鍾鼎字文昭上猶人聞范文正義田事慕之偕姪日新置義

莊建書院延師以訓鄉族子弟子三傑登紹興進士為化

州司法叅軍歸值建城盡其家之磚石輸官有司以聞賜

勅有哲夫成城保衛鄉里之褒

明一統志

盧汝舟字仲濟大庾人政和間以陸藻薦隸御史府廉約守

正不事刻深紹興中地震上疏推本劉向京房之學無慮

數千言官至武翼大夫

同上

李諤字正臣南康人建炎進士性機警歷州縣所至有惠政

嘗判吉州永豐盜起諤設法平之鄰境群盜聞風皆畏憚

數百里踪跡屏息累官至朝奉大夫

人物志

鄧富字孝積大庾人有智畧屢平寇盜人呼之曰鄧江南紹

興間以功累遷八州巡檢知昌化軍加授廣西路都鈐轄

武畧大夫

林志

何源字清卿大庾人通諸經分授其子長衢亨以春秋登寶

祐進士次光龍以禮記登咸淳進士門人莫如德亦以易

登淳祐進士父子師友淵源如此

同上

鍾作霖字民望上猶人紹興進士仕至通直郎為人以禮法

自持隆興癸未幼子祐繼之皆有辭藻

同上

莫士先字元亨大庾人專攻於學乾道辛卯舉鄉試調邕州

戶曹其子如德淳祐甲辰進士

人物志

曾守約字惟魯大庾人聞濂洛開統於郡心慕之負笈師事

黃幹以居敬為本窮理為要領慶元鄉薦充本軍學正文



行著稱同上

嚴寅字敬仲大庾人家世儒學事親盡孝紹定進士歷太常博士祕書省正字雖州觀察推官嘗決疑獄生全者甚衆安志

張南金字文雋大庾人淳祐進士屢辟戎幕皆於湖南廣東衆推其謀畫攝縣政治有聲奏為祕書郎知東莞縣人物志

謝泌上猶人淳祐間以薦授肇慶司理決獄明慎民謂不冤會茶寇起荆湘剽江西及嶺南泌獻策於制帥分兵犄角平之擢湖南提刑州鈐轄命下卒同上

盧宗邁字紹先汝舟姪年十三隸御史府樞密使汪澈臨邊視師檄以自隨宗邁熟知險阻澈深嘉之歷館職文雅練

達兩朝日曆成一歲五遷官至武翼大夫晚年藏書萬卷然不滿致身於武階云明一統志

鍾特立上猶人鼎之孫身長九尺五寸勇義過人寶祐戊午群盜犯邑特立率數從者禦寇盜驚其狀貌之異敗走俘馘甚衆以功授星子尉林志

按鍾特立人物志安志皆訛作元人今改正

曾和應字賢叔上猶人隱居梅嶺之陰清苦好吟八十不倦黃秋巖謂其得性情之正趙青山諸老多有品題同上

張季和上猶人咸淳間割股療父疾郡守趙孟邁以詩美之時稱孝子同上

李梓發字材甫上猶人德祐元年以世族舉為南安三縣巡檢元丞相塔出及呂師夔統兵圍上猶梓發隨邑令李申



吳及邑中諸義士堅守不懈塔出親臨門城上弓礮齊發元兵死者數千人元人曰此城甚小人心堅乃爾即徙寨水南旋解去文天祥表梓發為團練使督府諮議收之幕下申吳請梓發往來南贛之間圖戰守計祥興己卯元叅政賈居貞復引兵數萬來至城下梓發與邑令誓眾城守益堅時天祥兵在嶺外敗績行朝亡於崖山邑子黃桂紱知之適自外歸為元卒所獲令齎榜入城招降且傳崖山之難梓發大怒謂妖言惑眾戮桂紱無何城陷梓發與子姓四十七人皆自焚同時有唐仁黃賢張伯子劉淵子張南仲陽清叟及邑令李申吳俱遇害

人物志

元

李昌元字有貞大庾人延祐七年被薦授韶州教授誨士得

宜以學廩餘貲委學正陳仁傑李玄孫道生往廬陵造祭器樂器又延樂師叅校音律教韶弟子之明慧者每祀事人稱禮樂在庭云

人物志

何衢亨大庾人與弟光龍皆登宋進士至元十七年總管張榮聘權韶州教授誨迪頗勤引課業中選者編為儒戶免其徭役州人士皆欣戴之

安志

黃文傑字顯明上猶人大德間授安遠教尋辭歸所著有大學中庸雙說文獻彙郡學志提舉滕玉霄序其文

林志

明

黎翰翔字應文大庾人洪武四年舉賢良科授廣信永豐知縣歷信陽知州陞叅議未上卒從弟鳳翔字應瑞亦舉賢良科知獻縣

人物志



西江志 卷九十三  
吳谷賢字賓之大庾人洪武四年舉賢良科召對稱旨授廣西僉事弟谷善字美之亦舉賢良仕終廣西柳州府知府  
同上

賴子英上猶人洪武十六年貢生仕至湖廣叅政以廉慎勤敏稱安志

李琦南康人洪武十八年貢生歷刑部員外郎陞淮安知府左遷營繕主事陞郎中質直廉正歷官四十餘年彞險一節林志

周鼎字子重大庾人洪武中貢入國子差督重慶租賦又督修溧陽圩岸陂塘皆著績授兵科給事中歷陞廣東按察司未上卒人物志

按林志周鼎歷官湖廣按察司復左遷廣東市舶提舉

終化州同知與此不同

蔡原啓上猶人洪武中由歲貢拜監察御史剛正有風裁分省人物考

何雋大庾人洪武中以貢任貴州道御史先是雋任貴州都司斷事有政聲薦改是職風紀振肅同上

劉芳字彌章大庾人洪武初辟舉任本府儒學教授誨士有方能詩文有集傳於世子公振亦辟舉人物志

朱穀字玉雙大庾人洪武貢生授於潛令考滿寓京師元宵賞燈賦詩應制授翰林院五經博士以奏對明切陞行人司副應求賢對策超陞河南叅議陞湖廣叅政河南右布政復改山東總率諸郡邑役夫數十萬採木楚蜀處置得宜民不勞而事集以老疾乞致仕有詩集藏於家林志



譚翼字南宿大庾人洪武進士授龍溪丞未之官彗星再見求直言翼疏論時政謫戍南寧久之稍內徙建文初陞龍溪知縣尋擢兵部郎中與同年黃子澄練子寧善金川之難同諸郎署赴火死妻鄒氏子仕謹俱自縊人物志

蔡運南康人洪武歲貢建文中歷官四川山東叅政清勁不諧於俗罷去知賓州有惠政靖難師起不屈死之同上

熊受孫字性初一名紀善洪武中舉賢良科剛介不撓任監察御史以言事謫成都勾建文元年起知招遠縣靖難後受孫竊嘆胥吏覺之告訐逮死闔族五十餘人皆徙邊同上

按以上三人皆建文忠臣林志或不載或諱其死節事今補入

賴禮字周文南康人永樂初進士歷興寧沅江知縣所至廉介不阿卒於仕分省人物考

王時習字勉學南康人永樂鄉舉入太學修大典壬辰登進士擢御史巡按河南振肅風紀撫恤廣東發倉賑饑民還朝再命往督陝西諸營卒於官林志

劉永字克修大庾人永樂進士授刑部主事歷郎中以大學士楊榮薦陞荊州知府一郡稱治親藩所行多不法永疏聞於朝械繫詔獄幾遇害會朝審得釋復原官尋以憂去郡民數千人徒步京師懇留之特旨奪情起復前後歷十四年卒於任民立祠肖像祀之分省人物考

按劉永宦蹟詳見劉介夫所撰劉太守傳中

蔣誠字性存大庾人永樂進士授會同知縣改巴縣廉慎公



勤巴民歌之擢御史于謙薦有才望者陞行軍副使初任河南復調廣西後為石亨等所嫉致仕人物志

蔡彬南康人永樂進士任大竹令寬厚得民任滿當代百姓詣闕乞留再任後以疾歸林志

蔣銘字公紀大庾人宣德進士授南京工部主事陞吏部郎中謙慎廉介時復行薦舉之例銘得雲南澂江府歷八年清介著聞微疾乞致仕人物志

滕宗道大庾人宣德間辟舉仕興寧知縣流寇至率民兵破之調新會黃蕭養亂叅政戴弁以宗道有謀畧檄至郡城隨都督董興刻期平賊考績陞海州知州久之以知兵薦陞兵部員外郎卒於官同上

蔡雲瀚初名蒲字九節大庾人宣德進士初授工部主事謫

判平樂後歷福建僉事謝事家居以文學著稱林志

譚清字元潔大庾人父敏舉鄉試任州縣有循政清自幼端莊長矜行履天順中貢入監授南寧訓導由國子學錄陞荆府伴讀陳規諫不聽乞致仕後二年王果不道命總憲戴珊往體察得清所為箴銘詩記悉規諫語擬疏錄用以既沒而罷人物志

張九達字天衢大庾人弘治進士歷知揭陽休寧二縣擢南京禮科給事中端重方雅值內璫劉瑾誅疏瑾及賂瑾致大位者悉罷之除瑾所矯詔諸苛法擢湖廣叅議改廣西督軍征蠻冒瘴卒於任分省人物考

劉節字介夫南安人弘治鄉試第一會試第六及廷對以敷陳剴切寘二甲授兵部主事逆瑾竊政謫尹宿松陞廣德



知州累官四川提學僉事福建浙江布政使擢副都御史  
巡撫山東總督江淮漕運疏漕政五事次第行之嘗疏舉  
人才特薦泰州布衣王良績最晉刑部侍郎星變疏乞致  
仕卒年八十輯有廣文選周詩遺軌春秋列傳兩漢七朝  
文藪聲律發蒙並行於世 同上

劉寅字彥亮大庾人正德進士累官湖廣布政使弭楚藩英  
燿之難引年致仕壽九十餘卒長子自南以孝謹稱 人物志

譚瑋字德武大庾諸生幼從父於東莞縣治父以南京部郎  
言事里居瑋亦感憤為學文慕周秦書彷彿鍾王各極其至  
性至孝母劉宜人卒一慟幾絕三年不出苫次以哀毀致  
疾而卒 玉茗堂集

胡述上猶人好計議初為增廣生正德末王文成征輦辟為  
贊畫賊平授冠帶及宸濠之變復召至軍前有贊助功格  
於例不得授世蔭 人物志

王溥霖南康人正德末王文成征輦溥霖杖策謁見糾合族  
里願從軍者為數隊奮擊斬獲後犴勝不虞設伏遂陷沒  
文成書扁以旌之 府志

劉昭文字汝簡南康人嘉靖進士授行人進刑部員外郎年  
甫二十三遂絕意仕進從學於湛文簡鄒文莊之門與同  
志聚講旭山所著有求正集 人物志

王事聖字忠卿南康人嘉靖乙卯鄉薦任華陽知縣陞蘇州  
同知尋擢鎮江知府汪元洪等煽亂事聖討擒之調黎平  
府軍民不輯事聖以公誠臨之復上疏改鑄印文加軍民



字邊境靖謐踰年致仕蘇州鎮江俱祠之同上

黃養蒙字存一南安人嘉靖進士授遂昌知縣前令為豪猾所誣養蒙廉其非辜白出之擢吏部徧歷諸司計吏之歲日夕居曹中杜一切私謁旌別黜陟悉協輿論遷南太常少卿晉光祿卿尋陞南戶部侍郎南安故無城戊午邑燬于寇力贊夏尹汝礪築城之議已而寇復至邑賴以完後令議濬萬石陂復從通之二事為邑百世利里人深德之肖像立祠分省人物考

鄭溥南安人由進士為無錫令訪知其禮俗所由壞因示民以奢敗儉存戒禁明白自以裁減一身服御為率至其張具上官館遇過客俱酌豐約之中曰勞民以悅人非吾心也暇則與士大夫接歡卒莫敢撓以私秩滿陞南京戶部

主事揚州置分司權舟有大小二關舊皆征之溥往司權通小關恣舟行而國計仍足後擢雲南知府丁憂家居卒年五十六同上

國朝

劉如昌字天卿大庾人幼孤家貧事母盡孝嘗避亂遇賊欲殺之如昌跪泣曰死弗敢避有寡母在行擠於溝壑矣言訖復大慟賊憐而釋之又山行遇虎虎不為害及母卒哀毀盡禮每雷雨輒詣墓側哀號至老不改年八十卒府志

蔡希舜字仲韶上猶人八歲能文長而博極群書以明經授司理不仕隱居授徒郡邑能文者多出其門年八十卒著有雲溪集行世長子志育以明經司訓永新尋攝永寧學事適寧邑遭寅卯之亂庠士多陷於賊事平志育殫力保



全者數百人次志廉順治丁酉舉於鄉 同上

劉永慶字善符大庾人純慤真實內外稱其孝友與同邑易明宇友善明宇病篤以妻子相付託永慶曰是吾分也微子言吾將憇然耶已而值兵亂明宇家產蕩盡永慶膳其妻子營其婚葬復分已產之半并童僕給易子為終身計其曲盡友道如此 同上

贛州府

晉

朱鎮字世安贛縣人太康中郡辟為主簿不就安貧素以終其身 林志

陳方期字長年雩都人以孝行稱太康中辟功曹不赴執親喪號泣幾滅性一日假寐若有告者曰無益存亡願擇出

處方期矍然寤遂終身不仕 豫章書

南北朝

鄧德明郡人元嘉末就豫章雷次宗學與韋遙等為同志友博物洽聞該綜今古嘗作南康記一郡山川奇蹟及諸幽恠事表識為多此邦文獻德明為冠云 人物志

唐

鍾紹京虔州贛人初為司農錄事以善書直鳳閣武后時署諸宮殿明堂皆其筆也景龍中為宮苑總監會韋氏難紹京帥戶奴丁夫以從事平拜中書侍郎叅知機務明日進中書令越國公睿宗用薛稷謀改戶部尚書出為彭州刺史玄宗即位復拜戶部尚書改太子詹事不為姚崇所喜貶果州刺史復坐他事貶懷恩尉再遷温州別駕授太子



右諭德久之遷少詹事年踰八十卒紹京嗜書畫如王羲之獻之褚遂良真蹟家藏至數十百卷

新唐書

按鍾紹京府志以爲興國人今從史傳林志云鍾繇十世孫人物志云十五世遙遙華胄蓋不可考矣

綦母潜字孝通南康人開元進士由宜壽尉入爲集賢待制遷右拾遺終著作郎河嶽英靈集謂潜詩屹萃峭舊舉體清秀蕭蕭跨俗云

府志

按張損持曰詩紀綦母潜字季通荆南人曰南康人者據文獻通考經籍志也志引陳氏云南康今贛州

賴棐字忱父雩都人乾元進士甲科授崇文館校書郎不就退居田里大曆初李景暘作邑謂耆舊曰龐統里號冠蓋鄭玄間稱道德棐方古人夫復何愧即其所居號祕書坊

又爲祕書樓表之

豫章書

廖融字元素自虔化卜隱南嶽與逸人任鵠凌蟾王正己王元共結詩社自號衡山居士湘守楊徽之司諫張觀嘗訪融山齋贈詩諷其出竟不仕以卒刺史何承矩葬之其子姓多仕於湖南馬氏故廖於楚最著云

寧都先賢傳

馮祥興雩都人與二弟皆武勇尚義唐廣明間黃巢陷長安傾貲募兵勤王二弟沒於陣祥興累功爲將軍詔遣歸圖盧光稠及境光稠陰遣人刺殺之投屍羅溪數月不流因早遺骸露猶有生氣土人神之葬溪南復爲立祠

人物志

後五代

廖光圖字贊禹文學博瞻爲時輩所服湖南馬氏辟幕下奏天策府學士與劉禹李宏舉徐仲雅蔡昆韋鼎釋虛中齊



西漢志 卷九十三  
已俱以文藻知名有詩集二卷正圖匡圖兄弟行也並有  
名寧都先賢傳

按豫章書作廖圖者訛考五代史楚世家改廖匡圖為  
光圖以避宋藝祖諱十國春秋有匡圖匡齊而無光圖  
蓋匡圖即光圖也正圖別是一人胡震亨唐音統籤云  
匡圖一作正圖者亦訛再考宋史藝文志有廖正圖詩  
一卷廖匡圖家集一卷廖融詩集四卷廖邈詩集二卷  
廖凝詩集七卷寧都魏和公謂廖氏家藏集與李氏花  
萼集韋氏兄弟集竇氏聯珠集皆父子伯仲一門之作  
後世不易得云

衷愉字叔和本姓哀仕南唐惡其姓也賜之衷姓歷官監察  
御史禮部尚書李氏降宋愉恥事二姓棄官歸隱於東陽

巖黃冠野服終身不出

豫章書

廖偃虔化人祖爽父匡圖仕皆至刺史偃少倜儻喜奇節通  
左氏春秋班固漢書馬殷有國自祕書郎為裨將戍衡山  
縣殷子希萼與弟希崇爭國希崇命彭師曷幽希萼於衡  
山使甘心焉師曷至衡山偃在焉相與護視希萼甚謹遂  
築行府奉希萼為衡山王請命於金陵元宗為出師定楚  
亂希萼遂入朝偃為部署輜重尤勤瘁希萼流涕曰非偃  
盡忠豈能免禍至金陵授偃左殿直軍使萊州刺史使守  
道州以備南漢會明州叛潭州亦潰偃所部多潭人中夜  
作亂偃率親卒力戰不能支極罵而死元宗下制哀悼贈  
右領衛大將軍寧州刺史謚曰節

陸游南唐書

宋



黎仲吉字漢儒寧都人結廬金精山南讀書譚道稱弟子者百十人淳化中陳殿院薦於朝條陳時務舉賢良方正進士丙科天禧中叩閭言事忤丁謂授洪州文學謂罷相召對改袁州戶曹解職歸隱稱方外高人

寧都先賢傳

王奇字漢謀贛縣人少為縣掾史縣令偶題屏障畫鴈云隻隻銜蘆背曉霜盡隨鴛鴦立寒塘奇密續云曉來漁棹驚飛去書破遙天字一行令奇之因勸之學後游京師有聲場屋間居李文靖客舍文靖薨於位真宗臨奠見屏間秋興詩鴈聲不到歌樓上秋色偏欺客路中宿寺夢回荷葉雨渡江衣冷荻花風問為誰作左右以奇對名對稱旨特許殿試既登科有謝詩曰不拜春官為座主親逢天子作門生官至殿中侍御史

人物志

孫長孺字思齊寧都人嗜學好藏書凡經史百家無所不備大中祥符八年賜五經出身知潯州政尚仁恕累官太子

中允

林志

陳炳字晦之贛縣人有志聖賢不求聞達結廬崆峒山中躬耕樂道勤於著述包孝肅拯知端州時過虔師事之

人物志

按陳炳所著有文權十卷白雲編二十卷

盧世豪光稠五世孫天聖中母沒廬墓篋土為墳廬中泉湧一虎為守視有巨蛇入墳俄震死縣令陳廷揭其事於石

明一統志

劉鈞字子平贛縣人天聖進士調洪州司理讞獄詳平刑無冤滯性恬素不急榮進郡守余靖每為下榻敬禮之

人物志

溫革石城人寶元中詣闕上書願捐家貲盡市監書以惠後



學既得請攜書歸建樓貯之闢義館以來遠近之願學者仍儲廩三級為一郡所稱

林志

劉炳字韜仲贛縣人慶曆進士弟景維皇祐進士俱為郎唐介以彈外戚及宰執貶英州朝士以餞贈為諱炳兄弟與梅堯臣李師中賦詩以贈因得罪免官人高其義景維子敏材為廣東提點刑獄亦以廉稱

同上

王鴻字翼道雩都人工隸篆善八分書皇祐中以鄉舉遊太學再薦省試第一因失韻被黜鴻歸擇邑治之南四十里泉石清勝築室隱焉目其山曰晤山巖曰需巖從學者百餘人周茂叔倅郡時以書幣聘掌郡校不就肥遯四十餘年嘗注太玄經今不存

人物志

孫立節字介夫寧都人師李泰伯友曾子固嘗作春秋論孫

復見之撫卷嘆賞擢皇祐進士王安石行新法立條例司蘇轍為司屬官以議不合引去安石語立節曰條例司須得明敏如子者為之立節笑曰當求勝我者若我輩人亦不肯為是官矣安石嘿然徑起後為鎮江軍書記監司敬憚之曰是抗丞相不肯為條例司者移桂州節度判官宜州守王奇與蠻戰死被旨鞠行間吏士有罪者經制使謝麟收十二人付立節按以重辟立節持不可曰獄當論情吏當守法逗撓不進諸將罪也既伏其辜矣餘人可盡戮乎必欲以非法斬人則經制自為之麟奏立節拒抗立節亦奏麟侵獄事刑部竟如立節議十二人得不死蘇文忠公軾作剛說遺其子勸勵朱文公為之跋寧都主簿鄭載得刻於學宮

寧都先賢傳



朱申字維宣雋都人皇祐間有聲太學尤好談兵以憂歸創  
青雲閣讀書其中所交皆當世知名士已而居京師十餘  
年偃蹇不遇桂帥憐其才用邊勞奏補攝尉龍平期年而  
罷居家極貧著邊防兵論百餘篇時不能用 人物志

黃炎字晦之雋都人弱冠登甲科試鴈門令新法坐罪罷平  
生清介與孔毅甫孫介夫曾子固厚善嘗著安邦論未竟  
有旨差充四川廉訪使復任朝散郎通判湖州 林志

鍾棐字子翼顛縣人博學篤行為歐陽永叔尹師魯余安道  
曾子固所知然卒不遇隱於田間蘇洵南遊至虔棐與弟  
槩從之游洵不飲酒每為設醴儂智高叛嶺南聲搖江右  
郡守曹觀欲籍民財為戰守備謀於棐棐曰智高必不能  
過嶺無事而籍民民懼且走矣觀曰如緩急何棐曰同舟

遇風胡越可使為左右手况吾民乎不幸而有急則官與  
民為一家孰非吾財者何以籍為觀悟而止蘇軾自海南  
還訪棐已沒見其三子相持而泣作哀詞誄之 府志

曾準字子中顛縣人刻勵經史百家悉手鈔口誦登嘉祐進  
士調武功簿攝理獄事抗論不撓知公安縣火燔民居叩  
天反風通判臨江慎刑獄芝草生園扉或勸以獻曰此偶  
然耳子弼楸開幾皆為名臣 同上

李潛字君行興國人治平進士調洪州司理遷太常博士定  
皇太妃儀制執父喪足不入私室起復知蘄州初如京留  
泗上其子弟請先往欲貫開封戶籍應舉潛曰求事君而  
先欺君乎寧遲數年可也嘗知新淦時鹽法方行望風旨  
者多峻急民間破產十居六七潛獨下令從民便歷官開



西江志 卷九十三  
封尹中書令卒贈開府儀同三司謚文簡三子朴格楫繼  
登進士弟渾暨渾子存皆有時望 同上

郭峻字次山雋都人熙寧進士調南豐尉時夏侯偁為令訟  
盈庭未決會提刑毛抗至偁急付峻代為訊斷峻呼囚數  
十至庭下片言折之皆伏薦於朝授祕書省校書郎令崇  
仁轉著作郎知南城及洪州時江西最苦鹽法苛急峻從  
容不忍病民元豐中僉樞密院事卒官孫志康誌其墓 同上

鍾伯字少游龍南人紹京之後八歲能屬文元豐進士釋褐  
補韶州司理叅軍任滿轉瀛州防禦推官復知潯州建學  
造士學者多自遠方至經畧使熊伯通以國士遇之移蘇  
州改授廣州軍節度推官尋知陽山考課為天下第一士

大夫號為霹靂手自廣移節成都時安化蠻叛以伯諳練  
邊事除廣西轉運使乘傳之官與軍帥籌畫奏罷滇州及  
延德軍未幾進師蠻解圍來降邊圉以寧進龍圖閣學士  
兼本路安撫管勾經畧使以疾致仕有文集十五卷奏議

三卷 人物志

劉鵬字時舉瑞金人元豐進士為諫議大夫值蔡京用事連  
疏論之子舉夔靖康初知北靖州陷於金死之 豫章書

按文獻通考載鵬所著有縣務綱目二十卷

陽孝本字行先虔州贛人學博行高隱於城西通天巖蘇頌  
蒲宗孟皆以山林特起薦之蘇軾自海外歸過而愛焉號  
之曰玉巖居士嘗直造其室知其不娶戲以為元德秀之  
流孝本自言為陽城之裔故軾詩有云眾謂元德秀自稱



陽道州隱遯二十年一時名士多從之遊崇寧中舉八行解褐為國子錄轉博士以直祕閣歸卒年八十四宋史

按楊龜山有代虔守薦陽孝本狀稱許備至林志所載

失實今據宋史所著有玉巖集

孫勳字志康立節子元祐進士授奉寧軍節度推官時張幾仲為帥精選幕府請行者不一幾仲曰虔州孫志康不面諛得斯人庶知吾過遂辟之幾仲移冀州又與之俱歷鄆州學教授知舒州太和縣累遷至朝散郎知岳州時湖北新開邊調發他郡文檄旁午勳呼里中豪右出檄於懷授之曰吾不以付吏特寬為期期而不至者罰當倍眾許諾軍需告辦岳陽先經火災譙門兩觀鞠為灰燼勳登城嘆曰岳陽樓以偉麗聞天下今委於墟莽守臣罪也出所錫

度牒若干與虞人所獻山林巨材鼎新之不踰期壯峙如昔後請祠提點崇福宮歸有田在陳遂移家以終讀書無不貫穿文詞典雅有兩漢風善作古篆秦漢而下不取也有文集若干卷府志

按孫勳事林志不詳據贛州新志謂采蘇過撰孫志康墓志補入叔黨斜川集今失傳不知此篇從何而得所當亟錄者也

孫勳字志舉勳弟博學工詩蘇子瞻自海外歸過虔贈孫志舉詩有云小孫又過我歡若平生親清詩五百言句句皆絕倫其推獎如此采東坡集撰

按孫勳兄弟人物志不載東坡知貢舉在元祐三年勳其所得士東坡贈志舉詩中所謂孫郎表獨立霞戟交



西江志 卷九十三  
重闈連枝皆秀傑英氣推伯仁蓋指其兄勰所云小孫則指勳也

胡埜字德林寧都人師事孫立節居喪廬墓哀毀不勝與立節子勰同業太學念兄老歸侍開義館長春谷藏書萬卷延名士使族子弟受學焉大觀中舉八行政和八年登進士歷鄧州教授改婺州方寇陷城舉家被害所著有諸經

講義 林志

李朴字先之虔之興國人紹聖進士調臨江司法叅軍移西京國子監教授程頤獨許之移虔州教授以嘗言隆祐太后不當廢處瑤華宮有詔推鞠忌者欲擠之死使人危言動之朴泰然無懼色旋追官勒停會赦注汀州司戶徽宗即位右司諫陳瓘薦朴有旨召對首言熙寧元豐以來政

體屢變一二人臣互相排擊失今不治至不可勝救又言今士大夫之學不求諸己而惟王氏是聽敗壞心術莫大於此蔡京惡之復出爲虔州教授又嗾言者論朴學術不正不當預師儒罷爲四會令改知清江欽宗即位半歲凡五遷至國子祭酒高宗初除祕書監趣召未至卒贈寶文閣待制自志其墓曰以天爲心以道爲體以時爲用其可已矣所著有章貢集二十卷 宋史

曾楸字叔夏贛縣人準次子元符進士紹興中知福州拒僞楚命表高宗勸進扈從隆祐太后至虔軍民囂亂賴以撫定累官吏部尚書著有內外制東宮日記 林志

尹天民字先覺會昌人由太學博士出知果州相如縣時王黼得政黼舊在太學乃天民所隸齋生也有勸天民往謁



西江志 卷九十三  
者天民笑曰見王丞相豈不得好官但恐為地下顏閔所  
笑後除侍講不就 豫章書

曾開字天游崇寧進士累遷國子司業起居舍人權中書舍  
人草制多所論駁忤時相意左遷監大寧鹽井建炎初復  
知潭州再知平江府廣東安撫使復以中書舍人名進寶  
文閣待制知鎮江府兼沿江安撫使召為刑部侍郎遷禮  
部時秦檜主和議開當草國書檜慰以溫言曰主上虛執  
政以待開曰儒者所爭在義苟為非義高爵厚祿弗願也  
願聞所以事敵之禮檜曰若高麗之於本朝耳開曰主上  
以聖德登大位民臣之所推戴柰何自卑辱至此非開所  
敢聞也又引古誼折之檜怒曰侍郎知故事檜獨不知耶  
他日又至政事堂問計安出檜曰聖意已定尚何言公自

取大名而去檜第欲濟國事耳時詔侍從臺諫集議開上  
疏謂當脩德立政嚴於為備檜曰此事大係安危開曰今  
日不當說安危只當論存亡會胡銓上封事詆檜亟稱開  
由是罷以寶文閣待制出知婺州尋提舉太平觀知徽州  
以病免閒居十餘年卒七十一檜死始復待制致仕開嘗  
從游酢學與劉安世交故臨大節而不可奪如此 宋史

曾幾字吉甫其先贛州人徙河南府兄弼提舉京西南路學  
事按部溺死無後特命幾將仕郎試吏部賜上舍出身擢  
國子正除校書郎林靈素得幸作符書號神霄錄朝士爭  
趨之幾與李綱傅崧卿皆不往視久之為應天少尹靖康  
初提舉淮東茶鹽高宗即位提舉湖北江西提刑又改浙  
西會兄開為禮部侍郎與秦檜力爭和議檜怒開去幾亦



罷逾月除廣西轉運副使徙京南路請間得崇道觀僑居  
上饒七年檜死起知台州召對以疾辭除直祕閣歸故治  
未幾復召對時帝懲檜擅權之弊方開言路應詔者衆幾  
懼有獲罪者先事陳之帝大悅授祕書少監幾承平時已  
爲館職去三十八年而復至須鬢皓白衣冠偉然每會同  
舍多談前輩言行臺閣典章薦紳推重焉詔修神宗寶訓  
書成權禮部侍郎兄楸開皆嘗貳春官幾復爲之人以爲  
榮引年請謝上曰卿氣貌不類老人姑爲朕留謝曰臣無  
補萬一惟進退有禮尚不負陛下拔擢上閱勞以事除集  
英殿修撰又三年陞敷文閣待制金犯塞中外大震帝定  
議親征有欲遣使詣敵求緩師者幾疏言增幣請和無小  
益有大害爲朝廷計正當嘗膽枕戈專務節儉經武外一

切置之如是雖北取中原可也且前日詔諸將傳檄數金  
君臣如叱奴隸何辭可與之和耶帝壯之孝宗受禪幾又  
上疏數千言將召屢請老乃遷通奉大夫致仕擢其子逮  
爲浙西提刑以便養卒年八十二謚文清初佐應天時諫  
官劉安世亡恙黨禁方厲無敢窺其門者幾獨從之談經  
論事又從胡安國游其學益粹爲文純正雅健詩尤工有  
經說二十卷文集三十卷二子逢仕至司農卿逮終敷文  
閣待制而逢最以學稱同上

按曾幾其先贛人據史傳其徙河南當非一世幾曾僑  
居上饒茶山寺七年未聞一至贛上也向來志書皆援  
其父子兄弟入贛州人物地因人重固如是耶今仍之  
鍾岳字堯俞雩都人政和進士爲桂陽令任滿不赴調編修



唐稷嘗曰只今文行似此翁者絕少丞相周必大兄弟俱從游焉岳素不殖生產清貧苦節至無室廬可居

林志

唐稷字堯弼會昌人政和進士授樞密院編修官自號研岡

居士著有研岡集胡銓志其墓

豫章書

王質字景文興國人善屬文遊太學與九江王阮齊名著論五十篇言歷代君臣治亂謂之朴論中紹興進士名試館職不就張浚都督江淮辟為屬入為太學正忌者共讒質年少好異論遂罷去會虞允文宣撫川陝辟質偕行一日令草檄契丹文援毫立就允文起執其手曰景文天下才也入為勅令所刪定官遷樞密院編修允文當國孝宗命擬進諫官以質鯁亮不回且文學推重於時可右正言時中貴用事多畏憚質陰阻之出通判荆南改吉州皆不行

奉祠居山絕意祿仕

同上

按王質奏疏剴切明快通達國體郭青螺稱其文不下賈誼陸贄為豫章第一今其集世不傳所上孝宗封事一篇反覆二千餘言載豫章書中文多不具錄

郭杞字堯章雩都人峻曾孫隆興進士為翁源令縣闕尉寇犯境杞代尉督兵迎敵賊遂成擒提刑楊萬里奏薦改承事郎賜章服知南康縣後僉判陝州為人剛峭家無餘資與當時名士樓鑰黃仁傑相友善尤為萬里所知

人物志

曾興宗字光祖寧都人乾道七年舉解試特奏名授肇慶推官慶元初禁偽學興宗以嘗師事朱熹罷歸築室質管谷號唯菴自信益堅未嘗少挫敦行古禮四方從學者日衆朱子沒心喪三年所為詩文多溫厚典則

寧都先賢傳



李謙字和卿朴從孫少承家學淳熙進士為安福縣尉累官太常寺丞提舉浙東值歲饑賑濟有方遷左司郎中再遷左司諫光寧間上封事義氣激烈趙汝愚讀之曰臺諫手也呂祖謙以直節被竄謙贈以詩因忤韓侂胄罷歸築圃雲峰以居有文集四十卷

林志

繆瑜字珍叟龍南人淳熙進士為進賢令有守有為民甚德之工於詩為人所膾炙劉後村詩話云余筮仕江西繆瑜以詩來謁其調官一聯云有客去遊丞相宅無人來問孝廉船襟度俊逸乃爾著有崆峒集

人物志

陳敏字元功石城人父皓以破贛賊李仁功補官至承信郎敏身長六尺餘精騎射以薦擢閣門祗候時閩地多寇殿司兵往戍率不習水土至是始募三千兵置左翼軍以敏

為統制漳州駐劄敏按諸郡要害凡十有三處悉分兵扼之盜發輒獲贛州齊述據城叛敏聞之不俟命領所部馳七日徑抵贛圍其城踰月朝廷命李耕以諸路兵至破之累功封武功縣男領興州刺史除破敵軍統制尋丁母憂起復以所部駐太平州金主亮來攻成閔為京湖路招討使以敏軍隸之軍於荆漢間敏說閔曰金人精騎悉在淮汴都必無守備若由陳蔡徑擣大梁潰其腹心此救江淮之術也不聽從閔還駐廣陵時金兵尚未渡淮敏又說閔邀其歸師復不聽敏遂移疾歸姑熟孝宗即位張浚宣撫江淮奏敏為神勁軍統制朝廷遣李顯忠北伐浚欲以敏偕行敏曰盛夏興師非時且金人重兵皆在大梁我客彼主勝負之勢先形矣願少緩浚不聽令敏屯盱眙顯忠至



符離果失律敏遂入泗州守之金人議和詔敏退守滁陽敏謂滁非受敵之所改戍高郵兼知軍事與金人戰射陽湖敗之遷宣州觀察使召除主管侍衛步軍司公事居歲餘敏抗章乞以故部之兵再戍高郵乃升為都統制兼知高郵軍事仍賜築城屯田之費敏至郡板築高厚皆增舊制自寶應至高郵按其舊作石礎十二所自是運河通泄無衝突患四年北界人侍旺叛於漣水軍密款本朝稱結約山東十二州豪傑起義以復中原上以問敏敏曰旺欲假吾國威以行劫爾必不能成事願勿聽適屯田統領官與旺交通旺敗金有間言上知非敏罪乃召敏為左驍衛上將軍言事者議欲戍守清河口敏言金兵每出清河必遣人馬先自上流潛渡今欲必守其地宜先修楚州城池

蓋楚州為南北襟喉彼此必爭之地長淮二千餘里河道通北方者五清汴渦潁蔡是也通南方以入江者惟楚州運河耳北人艦自五河而下將謀渡江非得楚州運河無緣自達願朝廷留意及是再出守高郵乃詔與守臣左祐同城楚州祐卒遂移守楚州北使過者觀其雉堞堅新號銀鑄城以歸正人二百家迺歸降授忠州團練使罷為福建路總管改江西路總管贛州駐劄月餘朝廷命往福州揀軍又命還豫章再除武鋒軍都統制兼知楚州復光州觀察使以疾卒

宋史

劉十六郎瑞金人兄弟三人素負勇敢建炎中金人犯江西峒寇李鐵面乘亂擾虔岳飛奉詔討賊十六郎昆弟願自効屢立戰功竟沒於陣

林志



曾集字致虛，桂林孫。紹熙間，知南康軍事，勤理庶務，篤信仁賢，慕高安劉渙之為人，修其基，割公田以奉祀。朱元晦稱其為政知所先後云。人物志

曾松字堅伯，幾從孫。仕至江西帥。叅嘉定中，寓居建陽縣東北，有山曰竹原，為劉勉之舊隱處。朱子問道之所也。松慨想陳迹，有志尚友，作樂斯菴於其旁，居之。友人黃榦為之記。同上。

嚴宗字伯宗，贛縣人。寶慶進士，為上高主簿。士人多從之游。秩滿，受代漕臺，以試官闕，留之。校文寓蕭寺，有富家子以五十萬鬻舉者，因寺僧以請宗，召其人面叱之曰：「三歲大比，公卿大夫繇此途出，汝輩不潛心力學，乃欲以賄得之乎？縛汝詣吏，恐人謂我沽名姑已之，其人慚沮，退即日白。」

漕司乞迴避人咸服其公廉。同上

謝陟，明字彥升，贛縣人。學有志操，家貧，遭母喪，停柩未葬，隣偶失火，勢且延燒，陟明抱柩痛哭，不忍離誓，與俱焚。隣人競來赴救，乃得俱全。州郡辟舉皆不就。同上

曾原一字子實，興宗孫。舉於鄉，嘗與從弟原邨同師廬陵楊伯子。紹定庚寅，避亂鍾陵，與戴石屏諸賢結江湖吟社，及歸，偕其叔父益之，傾資產築城以禦寇，隱蒼山，構萬松亭。有詩號蒼山集，人多宗之。寧都古稱詩國，今東城構詩巷，相傳為二曾廬處。寧都先賢傳

蕭立等字斯立，寧都人。淳祐進士，知南城縣，歷南昌推官。辰州判，有惠政，遭世亂，歸隱蕭田，自放於詩，著有冰厓集。羅倫序之，謂南渡以後高品也。同上



陳繼周字碩卿寧都人淳祐三年貢於鄉授廉州司法南豐縣知錄藤州觀察推官知永豐衡陽二縣辟江東提點刑獄幹辦公事未上會詔徵勤王文天祥方守贛州造繼周問計繼周慨然為言閭里豪傑子弟與凡起兵之處方略甚詳於是留繼周幕中晝夜調度繼周雖弱不勝衣而年德有以服人人士視為父兄進止疾徐惟指呼無敢先後詔改繼周合入官帶行監文思院差充江淞置司主管機宜所部夜襲元兵於南柵門殺傷相當質明猶戰渴赴水死

宋史

按寧都先賢傳碩卿作顧卿又云天祥之臨安繼周率義士歐陽冠侯等二十三家及長子逢父次子桀以從逢父以所部襲元兵於南柵門及天祥使北營有旨罷

兵繼周父子領眾歸則贛已失守矣景炎初以繼周知南安軍元總管楊仔襲繼周殺之并殺逢父事聞謚繼周忠節桀從天祥於江嶺之間竟死潮陽云

尹玉寧都人以捕盜功為贛州三砦巡檢秩滿城居從文天祥勤王及天祥至平江調玉同淮將張全拒元兵戰於伍牧全軍敗先遁贛州四指揮軍亦遁惟玉殘軍五百殊死戰玉手殺數十人箭集於身如蝟毛援絕力屈遂被執橫四鎗於其項以挺擊之死餘兵猶夜戰殺人馬蔽田間無一降者質明生還者四人贈玉濠州團練使官其二子賜田二頃以恤其家

宋史

陳子敬贛州人以貲雄鄉里嘗從文天祥遊天祥聞汀州子敬募集民兵屯阜口據下流及天祥攻贛子敬與合謀忠



西江志 卷九十三  
效甚著空坑兵敗復聚兵屯黃塘連結山砦不降元軍以重兵襲其砦砦潰子敬不知所終同上

鍾克俊龍南人仙孫宋季補國學上舍生聞三宮北遷糾集義旅知勢不可為登馬祖巖遙望中原悲歌激烈賦詩一章有自許有身埋漢土終憐無泪哭秦廷之句遂赴龍頭江而死人物志

西江志卷第九十三

西江志卷第九十四

人物二十九

贛州府二

元

孫登龍字壽甫寧都人宋咸淳丁卯舉省試入元被薦為南安學正慶遠南丹安撫司教大德中遷歸仁州同知以仲子輔臣貴贈安樂郡侯吳草廬稱其行懿文淳蕭士贊亦稱其富於學而不矜府志

劉明德字作林贛縣人至正庚寅赴省試慷慨言時務落第感憤歸益閉戶讀書不衰廣東宣慰使與都刺薦為雷州路儒學教授規條戒訓率先諸生善於其職授慶元路總管府經歷未幾東境盜起勢搖郡邑遂解印歸灌園為終



老計卒年僅三十九士林惜之 人物志

蕭士贇字粹可立等仲子篤學工詩與吳文正公澄友善著有詩評二十餘篇尤愛李白詩為類補註行於世 豫章書

按蕭士贇所著有冰崖集

王竹逸蕭極初皆贛縣人力學攻詩賦自幼為同社友喜購先賢墨跡當元季之亂二人間關險阻未嘗少離凡憂愉感遇悉見於詩名聯輝集 人物志

鍾柔字元剛宋忠臣克俊之子父歿時甫一歲祖母吳氏母劉氏挾之走南雄及長歸從鄉先達劉震游融貫經史下筆頃刻千言閩帥廉訪交薦之署廣東雷州學正辭歸講授從者數百人咸推尊曰一峯先生所著有諸經纂說易詩書衍義及敝帚集 宋學士集

按鍾柔人物志訛入宋今據宋潛溪所撰一峯先生墓碣改正宋景濂曰中州士君子恒言虔南賢才鮮少有若一峯者其裔胄之悠久家學之盛著文行之隆蔚初亦何減於中州虔南之士讀余文者亦當有所奮勵而興起焉

劉君賢雩都人以教授為業府判王榮高其義上書薦之君賢堅不仕所著有昌雩集 林志

孫伯顏字元晉立節九世孫家世寧都少開敏年十五遊上京讀蒙古書而好之遂工譯語至元中考授京畿運判移提舉廣東市舶琛貝山積不以自污部使者薦其才擢肇慶路總管兼勸農事多做古法以為治以疾謝事卒 府志

按伯顏事詳見錢文肅習禮所撰墓志中



孫良臣弟正臣，穎人以文學世家。良臣仕至淄萊萬戶府經歷，正臣仕至吉水州知州。蔡五九攻城，良臣昆弟竭貲財募丁壯禦之，甚力。卒保障鄉閭，泰定初召正臣，賜衣冠歸。以壽終，旌其門曰義門。豫章書

溫春甫，寧都人。延祐乙卯，蔡五九攻城，春甫應詔率義兵討賊。臨陣突出，中矢歿。事平，贈千戶。死義傳

孫輔臣，登龍子，以文學舉。初為大都護府知印，五遷至湖南宣慰司元帥。陞資善大夫、廣西廉訪使。每有政聲，江西行省叅政全普菴撒里榜其居曰忠義之門。豫章書

鍾恕字以行，龍南人。柔子。至正鄉貢進士，署濂溪書院山長。不赴篤學，勵行不墜。家聲。人物志

劉元杰，石城人。倜儻有器識。少遇異人，授以風角鳥占之術。

因解兵法，至正十二年四方兵戈雲擾，元杰憤然起義兵，團結於通大寨，據險以守。賊攻四旬不破，邑人賴之。同上  
廖人俊，元末父死於寇，母被掠。人俊七歲，獨與祖母陳氏居。既長，焚香日夕，籲天願知父骨所在。久之，若有指導之者，竟得於叢冢間，收而瘞之。又聞母在滄州，徒步往求。至則已物故，欲負骨歸葬，異父弟不許，乃刻母像歸，祔父冢。祖母陳孀居七十一年，壽九十有九。人俊事之以孝，聞詔旌其門曰孝節，賜衣帽條環寶鈔。翰林吳澄揭傒斯為詩文紀之。寧都先賢傳

明

呂復字仲善，興國人。洪武初以文學徵為國學典膳。時修元史，闕順帝三十六年事，無考，遣使十一人分行天下，以北



平乃元氏故都山東亦號重鎮命復乘驛往凡詔令章疏拜罷奏請布在方冊者悉輯之或涉番書則譯而成文若乘輿巡幸宮中隱諱時政善否民俗歌謠以至忠孝亂賊灾祥之屬罔不備載赴山東亦如之已而續成史四十八卷以功陞太常典簿尋遣祭皇陵進卿坐事謫佃鳳陽未幾復原官卒子叔素

人物志

按豫章書呂復所著有采史目錄北遊集與泰和周是修劉子高蕭子明俱有唱和詩

劉承直字宗弼贛縣人元至正進士歷潮州同知入明被薦召對太祖奇其才識詔即元集慶路學為國子學拜金華許存仁為祭酒承直為司業承直為人剛正面折人過立規條以束諸生誘掖獎勵一時學者敬業樂羣多躋顯仕

每朝上呼諸生試所業有通悟者輒召承直褒賞出為浙

江僉事時承元亂用法嚴重按浙三年以疾乞歸家在崆

峒山陽自稱崆峒雪樵學士宋濂為賦

人物志

按王忠文禕崆峒山房記稱宗弼之曾大父蒼崖先生建精舍曰登雲集師友與子弟講學世以文學名至宗弼益自奮元時贛人第進士者自宗弼始云蒼崖先生名不著記中亦不署宗弼名府志作劉承直未詳孰是

鍾磐字希仁興國人潛心經史博洽古今元泰定間教授成都人才多所成就又教民耕種之利民感其惠立生祠祝之明初當道交薦特遣行人趙彥可捧勅書賜磐禮幣徵

赴闕道卒

府志

曾魯山贛縣人元時舉孝廉嘗官於潮後絕意仕進明太祖



遣將畧定南服過贛強起之魯山以野服見不克辭即日就道南中聞其至率先歸款以功擢潮州太守 林志

呂叔素名鎖住事父母甚孝父沒與弟叔熙叔寅廬墓母沒亦如之洪武乙卯奏旌 豫章書

凌吉龍南人洪武七年以文學科徵為刑部司門郎中持法明允獄無遁情已具成案即有力者弗能奪人服其公同

唐均弼字明輔安遠人國初以文行受知於學士宋濂薦補

本學教諭力行教化增闢學舍以居生徒士習為之一變以老謝事歸捐俸餘置義田以惠宗族 同上

彭舜榮性公直為閭里所信服偽漢熊天瑞攻城守將遁走舜榮結同里蔡必達等畫計堅守城賴以全比大明兵至

同溫德中盧舜元等舉州歸款 寧都先賢傳

溫德中寧都人至正壬辰盜起偕弟致中允中起義兵保障

一境致中陷陳被執不屈遇害德中暨諸弟竟擒渠賊以復仇甲辰明兵至贛兄弟倡率歸附 林志

管貞字源清寧都人洪武進士授陽穀縣丞寇至竭力以禦不克被執罵賊而死 寧都先賢傳

陳復原 一作寮 本姓李雱都人洪武中由監生任廣西平南縣主簿陞本縣丞值徭寇掠鄉廂復原帥兵迎敵戰於蛇黃

岡躍馬直前斬首十餘級中毒矢斃城中人力戰賊乃奔走事平立廟祀之 人物志

陳勉字希進寧都人永樂進士授御史清賦浙江尋命巡按有平倭功寧波衛軍盜糧連坐者五百餘人疏請多所寬



釋陞廣東副使召入為左副都御史扈從天壽山上欲出  
畋密雲勉疏謂民以食為天春深獵必傷稼上止毋行及  
親征漢庶人留守京城勉與尚書蹇義等建議增定賞格  
并給帳房布疋軍士大悅上以勉知兵改勅從駕凱旋賜  
賚甚厚宣德癸丑命征會昌長河洞至則諭以恩威賊首  
朱南鄭就撫議置守禦及巡司景泰元年陞南京右都御  
史掌院事乞休

寧都先賢傳

李旭字彥昇贛縣人永樂二年貢入太學時上欲清查賦役  
黃冊考選國子生三百人首推旭有幹才令總其事以慎  
勤稱旨除權監察御史出按福建踰年扈從巡狩北京貴  
州新設省一切創始事宜遣旭勘覈已又遣督造臨清倉  
廩具有成績陞湖廣按察使尋調山東陞湖廣左布政使

正統初請老以壽終

人物志

郭端字季正雩都人以貢入太學授行人選御史巡按廣東  
劾奏鎮守內監雷春及靖江輔國將軍所為不法皆伏辜  
繼巡雲南有稱假御史者迭擾閩廣湖湘間端捕得其人  
於延平永樂中命按兩廣併監軍考績陞山東僉事尋改  
交趾以黎利陷昌江總兵成山侯王通等暨端皆繫詔獄  
九年宥復原官卒

府志

黃閏字期餘信豐人永樂進士改翰林庶吉士聲動館閣同  
進者忌之在院九載左遷儀隴令吏民不敢欺號為鐵知  
縣卒於官年僅三十一所著有竹居吟藁

同上

余寬字仲仁贛縣人永樂庚子鄉薦初授金華知縣復除沙  
縣時因鄧茂七之亂邑遭屠燼百里盡為榛莽寬至重建



公署招集流亡鎮守刑部侍郎薛希璉一切倚賴之寬亦  
殫思竭力為之經理閭井粗復舊觀父子妻孥始得保聚  
竟以勞瘁卒官 同上

湯衡瑞金人永樂中由貢知休寧擢中府都事復出知昌化  
慈惠愛民勁直不撓時撫黎土官桀驁與縣官抗深為民  
害衡奏革土官黎人仍統於州縣自後地方乃安 人物志  
孫紹字復先寧都人宣德中以經明行修為縣令袁才輔所  
薦授本縣訓導未任丁憂遂絕意仕進從陶瑾學瑾卒於  
官遺二穉孫無所歸紹為之構室割田以資日給人咸義  
之 同上

宋策贛縣人質直敦行誼教授鄉閭自號梅溪隱者宣德癸  
丑膺懷才抱德薦不就嘗作雪窗四友吟以自適子必明

亦有父風 同上

黃德溫字伯理信豐人正統進士英廟北狩時有內侍為王  
振黨者旁叱言官於監國前德溫與朝士同憤廷批殺之  
血浣朝衣初選考功主事起復補兵部武選抗疏劾武臣  
怙勢求遷者戎政一清以事出判鎮江府掌馬政鎮有牧  
地數百畝為豪右所齧德溫按之豪饋金百鎰拒弗受竟  
復其地 分省人物考

按德溫分省人物考作德潤者訛今據正統戊辰登科  
錄改定

胡莊石城人正統間以貢授潯州府推官威信素著大藤夷  
奪去巡檢司印莊往撫諭印即送還范叅將被誣力為辨  
范懷金致謝却之早乞歸致仕人感其德 府志



西漢志 卷九十四  
素端字自中雩都人景泰庚午鄉薦歷程鄉永興教諭陞順慶府教授所至嚴督課程士類興起以母老乞休既歸孝養備至居喪毀瘠踰禮所著有適軒集 同上

劉廣字若深興國人景泰間貢授內丘知縣丁憂復除陽山邑初無城峒寇時擾廣拓地量工版築具舉雉堞鬼然地方賴保障巡撫都御史葉盛上其最未及錄用而卒 同上

盧鴻字大賓爲人外和內剛坐必正襟衣嘗曳地間居終日略無惰容性孝友自奉甚約其教人不專進取董文僖越師事之邑有士行者多出其門景泰間入太學授臨武訓導邑稱僻陋鴻訓迪諸生寒暑不輟居九載告歸 寧都先賢傳

李迪字循道興國人以鄉貢知開州修葺城池作興學校增

廣學基地二百畝有奇州人御史甘澤爲之碑在任多年拯救饑荒招撫流徙蓋種種有惠政云 人物志

董越字尚矩少孤貧竭力以奉母嘗教授村中夜歸熒熒有光前導比及門咆哮而去則虎也越以此自負人亦以此奇之成化乙丑及第第三人授翰林院編修上西北備邊封事乙未戊戌分考禮闈取中大學士王鏊梁儲等稱得人進侍讀充東宮講讀經筵講官屢有開陳孝宗登極進春坊右庶子賜麒麟服頒朔朝鮮餽贈一無所受朝鮮歲使至必問越起居焉憲宗實錄成擢太常少卿兼侍講學士擢南京禮部右侍郎尋拜南工部尚書贈太子少保諡文僖著圭峰文集使東日錄 寧都先賢傳

王京字宗周信豐人成化進士授刑部主事陞員外郎河南



有妖言獄久未決司寇奏委能者京往不兩月盡得其情請從寬治陞郎中出守瓊州時瓊人以訟逮繫者數百京日召四五至庭諭以理而示以法言下即服囹圄遂空丁父憂去任上念瓊在海外雜二黎特詔吏部起補舊郡瓊人聞京來老穉皆色喜既至而生黎願為編戶如熟黎者十餘峒亡何得疾卒

人物志

丁積字彥誠寧都人成化進士授新會知縣至卽師事邑人陳獻章為政以風化為本中貴梁芳邑人也其弟長橫於鄉責民逋過倍訴於積追券焚之且收捕繫獄由是權豪屏跡申洪武禮制叅以朱子家禮擇耆老誨導百姓良家子墮業聚廡下使日誦小學書親為解說風俗大變民出錢輸官供役名均平錢其後吏貪復令甲首出錢供用曰

當月錢貧者至鬻子女積一切杜絕俗信巫鬼為痛毀淫祠既而歲大旱築壇圭峰頂昕夕伏壇下者八日雨大澍積遂以疾卒士民聚哭於途有一嫗夜哭極哀或問之曰來歲當甲首丁公死無以聊生矣

明史藁

按白沙集樂歲詩曰長官願似丁明府甲首終年不到衙其輓詩曰有廟旌遺愛無錢返故鄉即此四語可知循吏大概矣

袁慶祥字德徵雩都人自幼卓越不群成化鄉舉入太學歷事內承運庫陳五事一曰省國費以節民用二曰嚴選舉以重守令三曰修武備以防邊患四曰存公道以守國法五曰起民望以惜才能疏入逮杖幾死放回成化戊戌登進士授灞山令有政聲陞刑部主事進員外郎會廣寇竊



發廷臣以名薦陞潮南韶兵備僉事既至相度機宜部署將校次第蕩平諸賊所招降者結以恩信從征多得其力建議分增城地置龍門縣分新會地置新寧縣為經久保障計又遷英德程鄉縣學以興起士類無何致仕歸養以壽終所著有松崖集

人物志

按袁慶祥明史藁無專傳附見高瓊傳中云以國子生於憲宗朝言事被杖今考登科錄慶祥係成化戊子舉人蓋明初由鄉舉入太學者例稱國子生也

曾柏字崇介寧都學生以孝聞邑人士稱曰白茅先生鄉里至今稱曾孝子父病躬視湯藥衣不解帶沒水漿不入口既葬廬墓朝夕奠哭母喪亦如之敬愛二兄白首如一

寧都先賢傳

魏和公曰邑生無憑藉而祀鄉賢祠者惟柏一人

胡克和字節之寧都人成化甲午鄉薦知松溪政不苛細綽有風裁奸宄斂迹民甚賴之嘗遊羅一峯之門稱其孝行

純至云

人物志

胡易字光貞年二十八始讀易即超然有悟登弘治進士吏部王恕深器之初授給事中監御庫論內監賀彬贖貨無厭彬飾辯有旨俱下獄後按覆多實易竟得直星變上修德預災疏語極切至易多所封駁糾正風采凜然奔母喪哀毀卒於途朝士惜之出其門下者李相國時何侍郎孟春汪少卿舉藍御史田劉郎中志道李員外郎繼先皆名臣所著有易學淵源山斗文範

寧都先賢傳

董天錫字壽甫越次子弘治進士授刑部主事歷員外郎中



閱十三年始守青州值青大蝗寬賦發賑悉從便宜遷浙  
江都轉運使沮巨璫私販權貴不能撼歷官貴州左轄以  
疾引歸時年五十有四所著有璜溪集 府志

嚴鍊字文器雩都人由鄉薦授杭州府推官三載考績囊篋  
蕭然時中貴專政納賄或勸稱貸以行鍊曰有貸必償常  
俸幾何非取諸民不能辦與其損民而利吾官盍去官以  
無損吾民乎當道賢而交薦之轉太僕寺丞奏減山東馬  
匹十之二三芻牧之民稍蘇其困陞平樂知府乞歸卒人

物志

何春字元之雩都人弘治甲子鄉薦聞陽明之教若有所得  
嘗闢觀善巖與同志之士論學其中初授詔安令崇學校  
立社學均賦役再補霍山治如詔安卒於官 同上

按何春所著有忖言集

劉潛字孔昭贛縣人少嗜學性端方讀經史必正衣冠肅容  
正德癸酉舉於鄉令銅陵聞王文成講學於虔乞歸受業  
家居十餘年郡學者多宗之 府志

俞溥字德洪信豐人爲陳白沙弟子清修飭行弘治間貢授  
涇府審理正憂歸不起闢館談道以倡來學疾革猶正衣  
正巾與學者講尊德性章端坐而歿 人物志

袁慶麟字德彰雩都人初爲諸生矻矻攻舉子業已而幡然  
有覺盡棄舊習師王文成銳志聖賢之學 同上

謝魁字文杓興國人爲諸生受學於王文成居常以道義自  
飭選貢入太學大司成歐陽南野命二子師焉授虞城令  
捍堤禦水爲民利賴以不合於時改樂昌期年辭歸 同上



管登字弘升雩都人少與何廷仁黃弘綱友善為王陽明門人勵志篤學由鄉貢授肇慶府判改廣州陞岳州同知冰檠自持常祿外一芥若浼同上

何緒字克承家會昌之白埠倚蕭帝巖為居父卒兄纓與其子亦早卒遺孤孫庶弟約方十歲皆撫育以至成人緒既善治生產於其父業贏數十倍弟約與其兄孫請分緒會其貲為三兄弟平受之年既老鄉里高其行縣為請鄉飲酒固謝終不肯與會昌人皆稱為何長者云震川集

何廷仁字性之初名秦雩縣人舉嘉靖鄉試謁選知新會縣喜曰吾雖不及白沙之門幸在其鄉敢以俗吏臨其子弟耶釋菜於祠而後視事遷南京工部主事滿考致仕三十年卒年六十六初聞陽明講學慨然曰吾恨不得為白沙

弟子今又可失之耶相見陽明於南康是時師旅旁午陽明希臨講席廷仁即與中離藥湖諸子接引來學由是學者益親已從陽明至越陽明沒後與同志會於南都諸生往來者恒數百人一時為之語曰浙有錢王江有何黃指緒山龍溪洛村與善山也明儒學案

按何廷仁學者稱善山先生論學務在平實有所持循其言曰吾人須從起端發念處察識於此有得思過半矣嘗作格物說以示來學

黃弘綱字正之雩都人舉正德鄉試從陽明於虔臺陽明教法士子初至者先令高第弟子教之而後與之語弘綱列於高第陽明歸越弘綱不離者四五年陽明卒居守其冢又三年嘉靖二十三年始任為汀州府推官陞刑部主事



時塞上多故將校下獄者吏率刻深以逢上意弘綱按法不輕上下以故不爲人所喜遂請致仕歸與東廓雙江念菴講學每過流連旬月卒年七十弘綱之學再變始者持守甚堅其後以不致纖毫之力一順自然爲主其生平厚於自信而薄迎合長於持重而短機械蓋望而知其爲有道者也 同上

按黃弘綱世稱洛村先生明史作何黃合傳以其皆贛人而同受業王門也府志二公傳詳於官事而略於學問今據學案以表明史合傳之意何有善山集黃有洛村集又各有語錄行世

丘紳安遠人正德間貢授睢寧簿值流賊劉六劉七攻城督兵捍敵身被七鎗死之事聞贈知縣蔭一子國子生長子

鳳來領鄉薦

人物志

雷濟蕭庚皆贛縣人都御史王守仁來鎮虔也知二人素有識畧置之幕下參謀平橫水桶岡三泖諸賊二人計畫居多宸濠反守仁過豐城聞變時濟庚在側即圖趨還贛州起兵南風正急舟不能動守仁亟呼一小漁船自縛印勅令濟庚持米二斗同載至新淦城下戒嚴不得泊濟庚張黃蓋以示乃開門羅拜駐吉安詐爲兩廣總督火牌兵部咨及各府報帖互相傳遞以撓其進止多寫告示并招降旗號木牌等項動以千萬計以散其黨與是時濟庚等乘黑夜衝風冒雨涉險破浪出入賊壘萬死一生中所差行間人役被宸濠殺死者皆其親信家人事平之後在冊功次俱被削去未幾庚死守仁親爲文祭之後濟謁選得四



川龍州宣撫司經歷 同上

袁淳字育真慶雲之孫嘉靖進士授承天司理擢御史巡按浙直所著有羅巖集嘗取古人之書自周迄明分類編次為二百餘卷名曰稽古大成藏於家 袁氏家乘

朱源字本深贛縣人宗孝子壽昌之裔飭躬篤行教授閭里王陽明作興社學以耆儒理之命源率所教童子入射圃歌詩演禮郡邑亦重其人歲與賓席年九十有七卒 人物志

劉載永長寧人正德末年廣寇葉廷芳等作亂盤據黃鄉勞田丹竹樓三保之地劉氏一姓被其慘禍永時年十三奉母避難志懷報讐至萬曆初白於府主運籌設策誘散其黨一鼓平之遂建縣治一布衣智畧如此其附祀報功祠

也固宜 同上

李涑字源甫雩都人生而穎異居貧刻苦有志王文成之學隆慶進士授寶應令寶應故水鄉會大水田廬蕩析涑自攜蔬糲循行阡陌勸其墾闢疏淪子遺賴以生活召拜戶科給事中江陵相不喪父而充大婚冊使因抗疏言此大典柰何以屬新喪令輟哭將事乎疏入江陵恚甚然不能難也尋復上言四方水旱不宜令尚方鉤盾諸臣作淫巧以損儉德出為山東僉事再遷廣西叅議進副使整飭蘇松四郡兵事著經賦一書欺隱飛灑之弊盡為搜剔超拜中丞撫江南先後在吳五年所御一冠一袷一布被不更置有城工羨五千緡為吏乾沒而守不察因上其事語侵守守強項藉口他事以自解守量移而涑亦予告還既歸



月會邑中同志講明良知之旨後起撫保定不就所著有  
養愚先生集 同上

温卓字時仰石城人以選貢授四川馬湖府推官歷署州縣  
及奉委勘尺採木并查盤各府不受一錢至鑿險路以便  
往來築石渠以滋灌溉人尤德之 府志

余光字緝之贛縣人嘉靖鄉薦授涪州知州居官以明廉著  
聲採木之役事集而民無重累以憂歸起復補廣安州過  
涪涪人率婦子逆於河許爭饋食頓顙稱祝迺去未幾陞  
南寧府同知益自刻勵土官承襲分例盡却之會討安南  
毛大司馬伯温為帥嘗召入幕府計事多采用已而安南  
降奪國號貶為都統司功狀上以與有勞擢南京刑部員  
外郎歸田二十餘年卒 人物志

胡尺簡字近道會昌人師事吉水羅洪先過雩又摳衣何廷  
仁黃弘綱之門嘗曰克念作聖惟此志耳羅以小友呼之  
以貢授嘉善主簿清修自勵勤於職業遷令長樂均賦興  
學士民愛戴之陞賓州知州不赴 同上

鍾譔字近修瑞金人隆慶間由選貢司訓南康飭躬潔履為  
郡太守所重署主白鹿洞教事轉永安學諭入為國子學  
錄滿考陞武昌通判職主餉矢操冰檠却例金歲以千百  
計後告歸蔬食菜羹蕭然自得以壽終 府志

劉壽仁長寧人隆慶間由貢授黃梅縣司訓倦游還家值縣  
治初建百凡區畫縣大夫常就問焉而縣志又皆出其手  
為人剛介不苟徇俗鄉閭推重之 同上

謝長良字子起瑞金人父為永定知縣小妻郭生長良於官



署六歲父滿秩遷官盡取羣書封識之他器物無所取九歲從父官鄂州踰年父卒哀毀骨立如成人母與嫡幾訟長良旦夕泣母前異居避之徑解訟相歡十一歲暴卒三日復甦人皆以是異之十三侍生母疾涕被面如不欲生已復侍嫡母疾與婢子同卧起旦暮拜而號如所以事生母嫡為感動十八補縣學諸生嫡始均產授之年二十與同縣楊以任等結赤水社是時舉業文字相習為勦剽割綴長良作四書辨魔論著綱目諸史為君子錄再困場屋以丁卯九月四日死於清江之橫梁時以任自南昌赴禮部試聞長良死歸視殯之長良有兩女無子以任為之立後 天傭子集

劉思誨字忠甫贛縣人萬曆進士授臨淮知縣招撫流移墾

荒田若干頃柳溝田水衝沙壓額徵如故思誨請於上官折半徵收因以所墾荒田補正額濠梁紅心二驛皆在臨淮境先時取十七州縣富民僉充馬遞驛卒其後專責臨淮逃亡幾半思誨曰害有大於此者乎乃覈徵羨商稅以足馬值發倉儲息粒以糶驛卒因條列為例築驛前南岡高柳長堤彌望數里令臨淮六年治行天下第一授監察御史巡按順永保河陞大理左丞在臺中議論與楊漣鄒元標葉向高尤相合時魏忠賢竊政思誨謂中旨頻宣非所以安元輔請以票擬屬閣臣元標以廷杖幾死筋骨拘攣不宜責以拜起疏出人人危之未幾楊奉旨切責思誨相過慰勞忠賢竟以前疏故降三級調外崇禎元年召還林下忠節諸臣有旨復思誨原官知交無為援者竟以寺



西江志 卷九十四  
丞終 同上

按思誨東林列傳作思海者訛人物志又失載今據艾千子所撰劉寺丞傳節存其概

溫國奇字仲庸寧都人萬曆進士授惠州推官陞御史首疏劾魏忠賢凡十三人皆落職崇禎初巡按江南累官四川驛道予告歸時閩賊猖獗避亂者爭入城國奇捐千金倡建新城自是東北郊關樓櫓相望居民賴之

府志

丘一鵬字萬程寧都人萬曆丙子鄉薦念父老不欲試禮部父嚴督之乃揚言上公車而私屏居閒處父果病念子不得見一鵬即走出見父與訣選知樂昌縣有鹽稅官例入知縣金數百商初見贄三百金一鵬盡革除之立碑為額禁陞惠州防海同知每出訊親至碣石衛按格閱舟卒皆

有法戊戌寇發一鵬即調度所素閱卒殲賊數千有閩賈五十人誤為邏卒所獲叅將欲作生功報上一鵬以去就爭之不得為移檄閩中報至果海賈也而一鵬已病篤賈人至官衙仰天祝涕泣願以身代死既卒而殲賊功方上

陞湖廣按察司僉事

寧都先賢傳

蘇大成字汝願寧都人弱冠舉於鄉屢上不第謁選得遠安時遇凶年兼有采木之役設處賑濟區畫採辦殊勞瘁而才足以濟之隣邑松滋缺令承委代攝百姓安其政教兩邑俱有頌聲最聞陞刑部主事進員外郎出為韶州知府

卒

府志

甘士价字維藩信豐人萬曆進士初令黟縣以廉能調丹陽入為御史和衷一疏大為中外所推比閱三關勵將飭戎



西江志 卷九十四  
鑿鑿皆石畫巡按三吳進大理卿巡撫兩浙以釐奸興利  
為已任濬南湖以疏水利警游徼以靖探丸裁監充以省  
浮費清餉羨以飽營兵戊申稽天之浸二百年所未有者  
疏留百萬漕糧貯發常平所存活不啻億萬名入為大理  
卿方候代而奄逝 人物志

盧達字漸甫寧都人萬曆進士授中書舍人改吏科給事中  
為人廉退靜儉不以一介求取於人兄通會試禮部中乙  
榜卒於京師時達年甫四十父母皆在遂力請終養以吏  
部尚書鄭三俊薦奉旨敦促時年七十有四以老疾固辭  
大學士葉向高詹事劉一燝皆寓書勸駕以公輔相期堅  
卧不起於是吏部尚書趙南星覆題曰盧達當引年之候  
堅易退之操請遂高致加陞太常寺少卿致仕享年九十

有三官於朝者六年家食五十三年以清德聞天下 魏叔子集

李一松字茂甫雩都人積學善屬文萬曆壬辰選貢以親老  
絕意仕進依依膝下如嬰兒弟一柏出入必偕甘苦共之  
孝友之風閭里歎慕李養愚講學羅巖一松師事之卒配  
祀養愚祠 府志

熊懋官字思守石城人六歲而孤苦志力學以選貢入南廡  
明年登京闈賢書謁選尹銅陵復除浙之慶元皆巖邑也  
有治狀轉漳州別駕歸而閉戶讀書一意修詞力追大雅  
所著有青箱遺藁 人物志

曾應遴字無擇寧都人崇禎進士初授刑部主事轉兵部職  
方員外改兵科給事中轉工科出督江西廣東兵餉入掌



兵科值遼左有警闖獻二賊蹂躪荆襄湖陝間凡所論奏  
皆洞中機宜甲申春被議去去二十餘日而京師陷唐王  
時起太常卿與楊廷麟等共事撫吉贛南

大兵南下抵贛戰敗衆散未幾病卒

同上

劉曰佺字勿仙贛縣人御史思誨之子崇禎壬午舉於鄉甲  
申之變與仲弟价慷慨自誓丙戌三月

本朝兵下吉安及圍贛曰佺與楊萬諸公共圖拒守城破被  
執死之子良竑同遇害母黃氏妻謝氏婦周氏俱赴池水  
死弟婦曾氏姪良翊俱投井死弟婦宋氏自縊於樓惟弟  
价竄伏得免尋以哭母兄而亡

人物志

楊以任字維節瑞金人崇禎進士淡於進取辭縣職改應天  
教授金陵士爭趨之矜為楊門弟子陞國子博士卒於官

年止三十五其制義海內傳誦與陳文章羅齊名

府志

丘如泰字東丘寧都人僉事一鵬季子幼孤父以廉官聞天  
下家無百金之產如泰篤事母兄母病醫言糞苦可治如  
泰嘗糞不苦撫膺大痛母竟愈年至七十卒及居喪哀毀  
踰禮仲兄尤貧減家食以給之曰饑飽同爾長詩古文著  
有玉屑篇若干卷子六人維屏最賢

同上

李大宏字屏岳寧都人兄某為澂江別駕好結客任俠多漫  
費大宏嘗捐千金以助之亦往往周人之急有假貸不責  
券遊南雍一時名彥陳際泰楊廷樞輩爭交之卒未詔舉  
文行士邑令葉向榮以其名應徵為國學典籍甲申國變  
語及輒嗚咽或云君非貴臣何必爾答曰草莽獨非臣乎  
後竟悒鬱而死

同上



魏兆鳳字聖期寧都人以孝行聞居父母喪哀毀如古禮家故饒於財性好施為鄉人葬死救患營橋梁道路以布衣聲動邑中崇禎初薦舉徵聘皆不就宗子五世單傳貧不能娶兆鳳為之授室閩人張者以妻為妹鬻數十金見其戚容詰得之立歸其妻鄒文清以訟論徒將嫁妻為贖出金與償更資給歸之三子祥禧禮皆以文行著名學者呼兆鳳曰徵君

魏氏家傳

曾忠字清輔寧都諸生母病發忠奉事湯藥護起居歷久不衰甲申冬夜火起中廳忠驚起入烈焰中救母妻楊氏抱子相隨救夫皆焚死明日眾臨觀舉除瓦石得其屍忠負母於背妻妾旁跪護之莫不悼歎知縣葉向榮親驗視報上官奏聞會世亂事寢

寧都先賢傳

曾嗣宗字元聲楊廷麟募兵嗣宗以諸生效三千金饗軍題授兵部主事從師吉安敗退保贛州將入城為守死計廷麟謂嗣宗曰事急矣毋從我嗣宗曰與公共事久柰何乘危而去卒入城俱死焉

同上

楊燧字心緯寧都人天啓選貢崇禎壬午除授雲南臨安通判以病辭清江楊廷麟督師入贛過寧都欲燧偕行答曰燧年已六十餘衰疾侵尋不能效馳驅冀邀國之靈得與公重握手道故幸也不然則一死以謝知己貪生以辱身吾不為也廷麟壯之執其手曰君即不能豈無才子姪可共事者乎燧乃薦其從子文琦偕往及城陷竟與楊同死時燧避亂山中聞文琦與楊殉義痛哭無時披髮佯狂或再日不食己丑冬挈家歸城庚寅邑城破遂冠帶自經死



彭錕字劔伯寧都人楊廷麟之次贛州也以錕署兵備僉事楊獨一子纔九歲屬之於汀州故人明年軍潰其僕自汀負之以歸於彭及贛州破楊死之有司跡捕家屬知楊氏孤匿其所遂欲併殺錕錕客有羅牧者并日走南昌求救於楊之門人吳某雜髮往見到門不納牧大怒徑還錕知無可倚乃以孤兒避之廣昌山中久之得解歸寧都庚寅二月

大兵至城錕使其弟奉母及楊氏孤先出曰以母及此子累汝汝莫死死則負我遂訣而使家具二棺與婦李氏對宴宴畢夫婦皆縊即夕成殮明日城破楊氏孤兒旋為兵所掠流寓彭士望者聞而出貲為贖歸居數年孤乃返清江

生子楊之後得不絕

寧都先賢傳

郭咸和字尚大贛人與兄咸雍咸熙咸治稱四咸萬曆戊子舉人令海豐海豐巖徼多盜咸和強力嚴明捕得盜魁二人伏於庭問以欲死欲生皆號哭乞命咸和曰若能使徒黨歸投當貫汝盜許諾即縱之去翼日復來述其黨內嚮無異志咸和單騎入賊巢諭撫之邑士大夫聞之皆為令危而羣賊則已襁負扶攜望馬首羅拜稱死罪乃令各陳所業立編冊以區置之有自陳欲為儒者設義學課之書陞廣州通守罷歸而歿

府志

黃大節字斯立信豐人萬曆進士授太常博士儲位久虛大節上疏言頃者奉聖旨俱不必封少俟二三年中宮無出再行冊立夫寢並封則三皇子之名號不至混而無別俟



至二三年則冊立之典又非杳然無期然而在廷之臣紛  
紛籍籍焦心蒿目者謂皇長子有生之日業已祭告郊廟  
覃恩兆庶儼然以主鬯居之不當一旦抑在王位苟儲宮  
定矣則皇第三子五子即從冊立之吉同日而封可也別  
日卜吉而封可也以首重在建儲而分封可次第舉也今  
但寢並封而皇儲未定是始假封王以陰奪元子之尊而  
終藉寢封以陽塞言者之路恐諸臣所以議不宜封之意  
不如是也又謂我朝家法原無待嫡之規蓋所重在早定  
國本以計安宗社不容一日少緩何嘗姑待之而限以年  
也今日之首務惟割帷房之牽制屏羣小之讒邪勿以私  
昵戕天性勿以小隙開大釁防微杜漸思遠慮深在皇上  
之早自悟耳臣備員太常與聞典禮故不敢避忌諱妄效

狂愚疏上舉朝震懾未幾以禮部出為浙江副使憂歸起

湖廣不赴年七十有一終

同上

楊以傑瑞金人萬曆戊子舉人初知安化舉卓異陞貴州都  
勻知府值苗仲作亂以傑佐督撫討之斬九千餘級築京  
觀勒記於衢招撫竄亡復業二萬餘口民立廟祀之乞休  
論功以副使缺起用不赴

同上

尹詔字蘭渚石城人崇禎貢廷試第一授推官初除衡州尋  
改永州擢兵部車駕主事時秦寇猖獗詔陳言忤時相譴  
歸甲申之變不食卒

同上

國朝

易學實字去浮雩都人生八齡父孔贊取孔叢子家語畀之  
若素所習者漸及經史了了無所闕年十六始令作科舉



文未弱冠而孤益攻苦力學與瑞金楊以任贛縣劉曰佺  
 曰价相友善明崇禎己卯領鄉薦庚辰下第癸未將北上  
 止於章門大河南北兵寇交訐乃歸里奉母入山憂思感  
 慨多見之詩文其後銓授分宜教諭不赴杜門三十年手  
 鈔困知錄示門弟子曰宋儒千言萬語綜於整菴三冊蓋  
 其指歸如此年八十三卒著有屏厓文集雲湖詩集府志  
 李騰蛟字力負寧都人明末為名諸生與臨川陳際泰羅萬  
 藻寧化李世熊同邑丘維屏為課文之會後同維屏入翠  
 微與魏禧兄弟為易堂交易堂之行序騰蛟最長未嘗以  
 齒自高而諸子皆兄事騰蛟嚴敬毋敢數後別居三巘峰  
 以經學教授作周易剩言年六十卒同上  
 丘維屏字邦士寧都人維屏少孤弱冠為諸生值國變避亂

翠微峰同志數人講習於易堂故居邑之河東多古松望  
 之蒼靄無際維屏著書其下號曰松下先生其學原本六  
 經左國史漢大家旁及諸子仙佛顧獨有得於泰西之書  
 心悟神解青州翟世祺守饒州傲僻藐天下獨傾倒維屏  
 七聘乃往世祺執北面禮甚恭維屏主其家為演易數亦  
 自著有周易勦說年六十六卒弟維寧字而康亦棄諸生  
 同隱同上

曾燦字青藜應遴仲子原名傳燦與兄傳燈並工詞章喜然  
 諾方國事多故燦兄弟思以功業自見折節下士一洗貴  
 介才華之習士論翕然歸附歲乙酉楊廷麟聚兵保吉贛  
 應遴計閩寇閩王總有眾十萬俾往撫之會  
 大清兵已克贛乃解散去燦後薙髮為僧奔走閩浙廣之東



西龔太常鼎孳應遴舊同榜愛其兄弟特甚勸燦出就舉  
 弗應大母陳母温念燦成疾乃始歸家謁省以大母命受  
 室築六松草堂躬耕不出者數年燦自幼有詩名選海內  
 名家詩二十卷號過日集僑居吳下二十餘年著西崦草  
 堂詩復客遊燕市以卒 同上

曾琬字庭聞寧都人原名傳燈弱冠過吳門師事徐詹事沂  
 張庶常溥深器許之父都諫應遴同楊劉守吉贛隨侍軍  
 中既而兵潰奔命汀閩久之走并涼出長城絕塞著籍寧  
 夏更名琬中順治甲午陝西鄉試計偕來京師名公卿間  
 曾至皆喜曰王仲宣乃能入鄴乎競延致之乙卯丙辰間  
 江右被寇與弟燦省母歸未幾病卒著金石堂集若干卷  
 同上

彭任字中叔寧都諸生少與同邑温應搏友應搏為亂民所  
 害時兵燹倉皇人不敢晝行任獨往購其尸哭而殮之連  
 遭內外喪疑大小戴喪制諸篇多雜亂無序分類次緝有  
 禮記類編結廬嘯山名所居曰一草亭足不履城市嘗一  
 訪其友謝文游甘京於南豐之程山未嘗再適他域所作  
 詩文亦絕少為人落穆悠游壽八十四終 同上

魏祥字善伯寧都人為諸生改名際瑞資敏捷善強記於兵  
 刑農穀禮制律法皆能窮析原委遇難事剖決如流客潮  
 鎮劉伯祿幕禁旅圍潮久不下主兵怒約城下之日盡屠  
 之祥力言於劉劉叩頭請之乃免范中丞承謨撫浙祥以  
 舊交招入幕所施發善政蠲荒賑饑諸疏多祥所屬草康  
 熙丁巳滇逆將韓大任踞廬陵贛當事議撫之大任揚言



非魏善伯至吾不信時祥館於總兵哲爾肯所遂遣之祥至家其姊丘邦士婦泣勸毋往朋友諸弟皆難之祥太息曰此鄉邦宗族所關也吾不行恐禍及行而無成吾身當之遂往甫入營官兵遽從東路急攻大任疑其賣已謂曰先生來將為賈林乎抑效酈食其也祥無以應猶以其雅度盛名拘留之十月大任變計走降閩拔營之日祥遂遇害所著文集十卷雜組五卷同上

魏禧字冰叔寧都人甲申後棄去諸生從父兆鳳結廬翠微峰與同志九人為易堂學九人者南昌彭士望林時益寧都則李騰蛟丘維屏彭任曾燦及禧禧之兄祥弟禮時燦兄畹盛才名號二曾以領鄉薦不得預祥亦時出佐大帥戎幕跡介隱顯之間堂中人以竹林山王待之八人皆巖

處躬耕以自食束修砥行讀書論古名公卿聞其名願見之弗往獨與沈淪窮約者遊其為文日益有名於天下江右自歐陽鄒魏祖陽明講性學陳艾依復社工帖括聲力氣燄學者景從易堂起而以古文實學為歸風氣為之一振由禧為之領袖也議者謂禧淹通史學經學其所未遑禧亦自言不敢依附程朱謬為精微之論康熙十七年詔舉博學宏詞禧在舉中以疾辭郡縣督趣就道昇疾至南昌醫藥累月稱病篤罷歸卒年五十七著有文集二十二卷詩集八卷左傳經世若干卷同上

魏禮字和公與兄祥禧齊名故更為伯子叔子季子以自號海內亦遂稱禮為魏季子少於禧五齡父命禧授之書笞罵亦樂受曰叔兄愛吾也比弱冠更刻苦自勵學日進兩



兄儼然以畏友待之既棄諸生乃益事遠遊歷閩廣渡海  
達瓊崖北抵燕京返轍夸門過雒陽南浮漢沔入秦關涉  
伊水經鳳滁道中足跡幾遍天下所至必交其賢豪尋訪  
窮巖遺佚之士嘗省故人於韓城往觀砥柱三門聞道人  
彭荆山居華山絕嶮直上四十里手鐵索躡飛磴訪之高  
於昌黎痛哭處十里性慷慨所得金施與輒散盡分居翠  
微峰之頂榜曰吾廬更以自號年六十六卒子世儼  
皆有文集 同上

楊長世字延會瑞金人順治己亥歲貢除興安學訓不就楊  
為瑞著姓長世於族行最尊自副使以傑學博以任皆在  
諸子列以是州閭鄉族咸推為祭酒日閉戶校讐目覽手  
披無寧晷閩汀黎士弘同郡易學實魏禮皆與為同學子

以兼庚子孝廉亦以醇行著名 同上

楊兆鳳字爾翔瑞金人以明經授上饒訓導兵燹後學校荒  
蕪人才零落蒞任初即捐俸修葺學宮以古學砥勵諸生  
士風丕變著有寓鴻亭詩文二集 縣志

魏世傑字興士寧都諸生父際瑞為韓大任所害世傑徒步  
迎喪至家拔佩刀自刎左右強持之遂日夜椎膺血下腹  
痛儻不能立呼號二十日而死時年三十三人比之何炯  
謝蘭云著有梓室詩文集行世 府志

孫麟貴字廣成贛州人父經世同弟緯世絃世死於丙戌之  
難闔室俱殉麟貴甫數齡為副總兵楊繼所得愛其聰慧  
子之遂博通文籍以才名為當途賓禮御史筮重光至以  
小友呼之年將艾始舉康熙戊午鄉薦為清江學諭陞崇



信知縣

御駕征噶爾旦以解馬功錫蟒袍一襲在官清勤著聲引年乞

歸修續贛郡志卒年八十 安志

劉天真字汝迪興國人貢生授安仁訓導逾年以老謝歸卒年八十五所著有河洛先天圖說多先儒所未發 府志

西江志卷第九十四

西江志卷第九十五

寓賢

君子之道或出或處寓公不臣導疆靡阻維彼賢聖皇皇  
羈旅至於是邦觀其所主一時過化蹟留亶古亦有名流  
適彼樂土憑弔山川裴徊仰俯履綦陳跡後先踵武地緣  
人重名可指數苟非其人僅儕商賈作寓賢志

南昌府

周

澹臺滅明武城人字子羽狀貌甚惡欲事孔子孔子以為材  
薄既已受業退而修行行不由徑非公事不見卿大夫南  
游至江從弟子三百人設取予去就名施乎諸侯 史記

按子羽墓有三一在泰山南武城縣一在陳留裘氏鄉



一在豫章東湖上其中必有一誤宋程大昌友教堂記云後世去古聖賢絕遠既無所事畏亦無所有諛而爭獵以自夸耀於是有一事而彼此互相同者使人慕尚如此無乃聖賢之澤久而不泯也歟其亦民之秉彝無古今而好是懿德也歟則其偽也乃其所以為可尚也況今之疑未必非昔之信者歟今豫章不獨有祠墓兼有澹臺門用仍舊志以弁寓賢之首

慶忌吳公子也驟諫吳子曰不改必亡弗聽出居於艾

杜註艾吳

邑豫章有艾縣

遂適楚聞越將伐吳冬請歸平越遂歸欲除不忠

者以說於越吳人殺之

左傳

漢

許劭字子將汝南平輿人少峻名節好人倫多所賞識司空

楊彪辟舉方正敦樸皆不就或勸劭仕對曰方今小人道長王室將亂吾欲避地淮海以全老幼乃南到廣陵徐州刺史陶謙禮之甚厚劭不自安告其徒曰陶恭祖外慕聲名內非真正待我雖厚其勢必薄不如去之遂復投揚州刺史劉繇于曲阿其後陶謙果捕諸寓士及孫策平吳劭與繇南奔豫章而卒

東漢書

晉

鄭袤字林叔滎陽開封人高祖衆漢大司農父泰揚州刺史有高名袤少孤早有識鑒荀攸見之曰鄭公業為不亡矣隨叔父渾避難江東時華歆為豫章太守渾往依之歆素與泰善撫養袤如己子年十七乃還鄉里景元初拜光祿大夫封密陵侯

晉書



西漢志 卷九十五  
衛玠字叔寶河東安邑人年五歲風神秀異及長有盛名辟  
命屢至皆不就久之為太傅西閣祭酒拜太子洗馬兄璩  
為散騎侍郎內侍懷帝玠以天下大亂欲移家南行母曰  
我不能舍仲寶去也玠啓諭深至為門戶大計母涕泣從  
之臨別玠謂兄曰在三之義人之所重今可謂致身之日  
兄其勉之乃扶輿母轉至江夏玠妻先亡征南將軍山簡  
以女妻焉遂進豫章是時王敦鎮豫章長史謝鯤先雅重  
玠相見欣然言論彌日敦謂鯤曰昔王輔嗣吐金聲於中  
朝此子復玉振於江表微言之緒絕而復續不意永嘉之  
末復聞正始之音何平叔若在當復絕倒玠嘗以人有不  
及可以情恕非意相干可以理遣故終身不見喜愠之色  
以王敦高爽不群而好居物上恐非忠臣求向建鄴京師

人士聞其姿容觀者如堵玠勞疾遂甚永嘉六年卒時年  
二十七時人謂玠被看殺葬于南昌謝鯤哭之慟人問曰  
子有何恤而致斯哀荅曰棟梁折矣不覺哀耳咸和中改  
塋於江寧同上

按郭子章云叔寶東晉名流一統志南昌流寓不載特  
為補之又云玠以永嘉六年五月六日至豫章其年六  
月二十日卒此則玠之南渡豫章四十五日豈暇至都  
下而亡乎且諸書皆云玠亡在豫章不云在都下也玠  
葬南昌城許徵君墓東

范宣字宣子陳留人年十歲能誦詩書嘗以刀傷手捧手改  
容人問痛耶荅曰不足為痛但受全之體而致毀傷不可  
處耳少尚隱遁加以好學手不釋卷以夜繼日遂博綜衆



書尤善三禮家至貧儉躬耕供養親歿負土成墳廬於墓側太尉郗鑒命為主簿詔徵太學博士散騎侍郎並不就家於豫章太守殷羨見宣茅茨不完欲為改宅宣固辭之庾爰之以宣素貧厚餉給之宣又不受宣雖閑居屢空常以誦讀為業譙國戴逵等皆聞風宗仰自遠而至諷誦之聲有若齊魯著禮易論難皆行於世

同上

唐

權臯字士繇秦州略陽人祿山反天下聞其名爭取以為屬永王舉兵脇士大夫臯詭姓名以免玄宗在蜀聞之拜監察御史會母喪得風痺疾客洪州浙西節度使顏真卿表為行軍司馬召拜起居舍人固辭嘗曰吾潔身亂世以全吾志欲持是受名耶李季卿為江淮黜陟使列其高行以

著作郎召不就自中原亂士人率渡江李華柳識韓洄王定皆仰臯節與友善卒年四十六洄等制服行哭詔贈秘書少監元和中謚貞孝

豫章書

張寧字康叔洛陽人登進士授相王府司馬擢御史大夫與陸贄韓愈友善德宗建中間陞國子監祭酒立朝審諤忤盧杞因棄官慕柳渾高風聞其隱於武寧山遂訪渾遺蹤入紫鹿岡青牛洞慨然止曰紫鹿青牛非方外人不可狎遂隱居於此

武寧縣志

曹松字夢徵舒州人學賈島為詩依建州李頻頻卒值寇亂避地洪州西山唐昭宗光化四年禮部侍郎杜德祥榜及第時年七十偕第者歛人王希羽亦年七十餘及京兆劉象閩人柯崇鄭希顏皆年六十餘號五老榜值上新平內



西漢志 卷九十五  
難開放新進士喜甚詔選中有孤寒者以名聞特教授官  
故德祥以松等塞詔授校書郎 姓源珠璣

南唐

陳陶字嵩伯世居嶺表以儒業名家陶挾策長安聲詩曆象  
無不精究昇元中至南昌將詣建康聞宋齊丘秉政自料  
與齊丘不合乃築室西山日以詩酒為事會齊丘出鎮南  
昌陶志不屈而齊丘亦不為之薦 南唐書

潘承祐字乾休晉安人仕吳為光州司法叅軍郡有大獄群  
吏不直承祐固爭之不得因棄官歸閩嶺及王氏據閩仕  
至大理少卿王延政鎮建州辟為度支判官延政與福州  
構隙承祐極諫不納及延政僭號以為吏部尚書而用其  
幸臣楊思恭為僕射承祐復爭遂逐歸私第查文徽下建

州以禮致之元宗以為衛尉少卿遷鴻臚卿委以南方之  
事升降人物制置郡縣多用其言薦陳誨林仁肇皆著功  
効老病乞骸骨以禮部尚書致仕卒於洪州西山 同上

鍾蒨字德林隨兄懷建家豫章屬辭敦行綽有時譽起家藩  
府從事累登臺郎遷集賢殿學士後主時官勤政殿學士  
宋師入金陵蒨朝服坐於家兵及門舉族死之 十國春秋

宋

徐鉉字鼎臣揚州廣陵人十歲能屬文仕吳為校書郎又仕  
南唐李昇父子試知制誥與宰相宋齊丘不協貶泰州司  
戶掾俄復舊官璟死事其子煜為禮部侍郎歷尚書右丞  
宋師圍金陵遣鉉求緩兵時煜將朱令贇將兵來援煜以  
鉉既行欲止令贇勿令東下鉉曰此行未保必能濟難江



南所恃者援兵爾要以社稷為重豈顧一介之使置之度外可也煜泣而遣之及至雖不能緩兵而入見辭歸禮遇皆與常時同及隨煜入覲太祖責之聲甚厲鉉對曰臣為江南大臣國亡罪當死不當問其他太祖歎曰忠臣也命為太子率更令淳化二年廬州女僧道安誣鉉姦私下吏道安坐不實抵罪鉉亦貶行軍司馬卒年七十六鉉無子門人鄭文寶護其喪至汴胡仲容歸其葬於南昌之西山有文集三十卷

宋史

李夤建安人有清節仕江南李氏至諸司使宋初授官不拜舉進士為衢州司理參軍以母在江南棄官歸後其子虛已亦舉進士通判洪州迎夤至豫章樂其山水曰此可以終吾身也遂於東湖築第以居并建涵虛閣平生喜為詩

與子壻晏殊唱酬有雅正集二十卷行世

林志

李積中四會人元豐進士為御史敢直言元祐中司馬光秉政罷新法積中力贊其議歷翰林直學士後蔡京為相黜元祐之黨凡二百九十人積中與焉因徙家於洪州後裔安國大性大異大東俱知名

府志

邵成章欽宗朝內侍也建炎初上書論黃潛善汪伯彥誤國之罪帝怒除名南雄州編管侍御史馬伸言成章緣上書得罪今是何時以言為諱久之帝思成章忠直召赴行在其徒忌之譖於帝曰邵九伯來陛下無歡樂矣遂止之於洪州金人入洪聞其名訪求得之謂之曰知公忠正能事吾主可坐享富貴成章不應脅以威亦不從遂釋之曰忠臣也吾不忍殺遺之金帛而去

宋史



蘇雲卿廣漢人紹興間來豫章東湖結廬獨居待隣曲有恩禮無良賤老稚皆愛敬之稱曰蘇翁身長七尺美鬚髯寡言笑布褐草履終歲不易披荆畚礫為圃藝植耘芟灌溉皆有法度蔬視他圃尤勝夜織屨堅韌過革舄人爭買之少與張浚為布衣交浚為相馳書函金幣屬豫章帥及漕曰余鄉人蘇雲卿管樂流亞遁跡湖海有年矣近聞灌園東湖其高風偉節非折簡能屈幸親造其廬必為我致之帥漕密物色曰此獨有灌園蘇翁無雲卿也乃屏騎從更服為游士入其圃翁運鋤不顧進而揖之翁曰二客何從來耶延入室土銼竹几地無纖塵案上有西漢書一冊二客恍若自失默計以為蘇雲卿也遂叩其鄉里徐曰廣漢客曰張德遠廣漢人翁當識之曰然客又問德遠何如人

曰賢人也第長於知君子短於知小人德有餘而才不足因問德遠今何官二客曰今朝廷起張公欲了此事翁曰此恐怕他未便了得在二客起而言曰張公令某等致公共濟大業因出書函金幣寘几上雲卿鼻間隱隱作聲若自咎歎者二客力請共載辭不可期以詰朝上謁旦遣使迎伺則扃戶闐然排闥入則書幣不啓家具如故而翁已遁矣竟不知所往

同上

按劉子翬集有蘇雲卿傳宋史全載其文

宋自遜字謙父別號壺山居士金華人徙居南昌父子兄弟皆能詩而謙父尤著方虛谷亟稱其殘年日易晚夾雪雨難消之句所著有詩餘名山樵笛譜

安志

元



伍良臣元濟陽王甥撫州路經歷至正間避於進賢縣崇信鄉雖屬懿親恬然如布衣致力經籍從事翰簡有詩若干卷題曰中流一壺又編通鑑纂要補論見聞錄府志僕列箎字世德回鶻人父文質官于江西遂居豫章列箎與兄弟五人俱登進士方伯表之曰五桂坊列箎由翰林出監海潮州有惠政罷歸民留之不得至正間紅巾亂藩臣檄掌東門之管既奉命往別道士陳白雲曰予世為忠臣兵事不可測誓不辱國辱先願以身後相託歸具牲酒酌祖墓囑妻孥曰城倘不守爾等當即赴池井勿污賊城陷列箎遂投井死妻妾子女死者十有一人明日道士乃浚井竭池求屍具棺槨以葬聞者為之感慨云林志按列箎兄弟五人哲篤大德戊戌進士官吏部尚書玉

立延祐戊午進士由編修監泉州有惠政泉人立祠祀之直堅至治辛酉進士宿松知縣朝吾至正丁亥鄉薦

明

孔叔賢先聖五十七世孫父希魯官廬陵值元季道不通歿於官叔賢留寓南昌之新吳家焉子二長斯誠次斯聞皆

卓立有成人行

梁混坦菴文集

謝復字一陽祁門人聞吳與弼倡道棄科舉業從之游身體力行務求自得居家孝友喪祭冠婚悉遵古禮或問學曰知行並進否則落記誦訓詁矣晚卜室西山之麓學者稱

西山先生

明史藁

伍伯遜汀州寧化人徙居南昌與弟伯暘伯達並力學敦信義同居數百口雍睦無間胡祭酒儼深嘉重之子恒受業



吳聘君之門景泰間應賢良詔以親老辭不赴終養於家

林志

蔣杰字美居普安人萬曆己丑進士授戶部主事歷郎中抗疏請視朝極言晏安中隔之弊留中不報知南雄府陞副使以內艱歸崇禎間子克顯任上高令解組為奉親避地之計遂徙居豐城著九經選鈔十七史摘要邊略議治河議畧式穀堂集息園小草靜寄軒橐南遊日錄東遊漫草紀遊小草武陵晤語普安續志

府志

國朝

陳上善字元水蘇州人博學好古以詩名海內兼工篆隸僑居東湖去榆墩不數十武與萬時華陳弘緒徐世溥相友善遭亂家破子身窮老經奇卓犖之致一發於詩所著有

山居詩及適餘堂集

施閏章集

瑞州府

宋

滕元發字達道東陽人以翰林侍讀學士言新法之害貶居筠州或以為復有後命元發談笑自若曰天知吾直上知吾忠吾何憂哉因上章自訟曰樂羊無功謗書滿篋即墨何罪毀言日聞神宗覽之惻然即以為湖州

宋史

蘇軾字子瞻眉山人嘉祐進士元豐二年謫授黃州團練副使七年移汝州安置省弟轍由九江至筠州先一夕洞山僧雲菴壽聖僧聰惠皆夢同轍迎五祖戒禪師其後軾至寓居廣福寺因額其堂曰同夢坡山及來蘇渡皆以軾得名其他題咏甚夥後仕至禮部尚書端明殿學士卒年六



十六諡文忠

高安縣志

李顯忠字君錫初名世輔綏德軍青澗人孝宗隆興間銳意恢復張浚遣顯忠出濠州趨靈壁復宿州紇石烈志寧自睢陽引兵來攻顯忠竭力捍禦以邵宏淵妬功阻撓師無鬪志潰於符離安置顯忠于筠州而宏淵仍前建康都統制後朝廷知其故復顯忠太尉奉祠

綱目續編

呂祖儉字子約祖謙之弟受業祖謙如諸生監明州倉將上會祖謙卒欲終暮喪朝廷從之潘時經略廣東欲辟為屬祖儉辭尋以鄭僑張杓羅點諸葛庭瑞薦召除籍田令寧宗即位除太府丞時韓侂胄用事正言李沐論罷右相趙汝愚祭酒李祥博士楊簡皆上書訟汝愚沐皆劾罷之祖儉乃上封事曰李祥老成篤實非有偏比蓋衆聽所共孚

者今又斥逐臣恐自是天下有當言之事必將相視以為戒鉗口結舌之風一成而未易反是豈國家之利邪疏上束擔待罪有旨呂祖儉朋比罔上安置韶州至廬陵將趨嶺得旨改吉州遇赦量移高安從弟祖泰徒步往省留月餘語其友王深厚曰自吾兄之貶諸人箝口我雖無位義必以言報國當少須之今未敢以累吾兄也祖儉沒貶所詔令歸葬所為文有大愚集

宋史

陳良祐字天與金華人登紹興進士歷起居中書舍人左司諫言會子之弊願捐內帑以紓細民之急上慨然從其言累遷吏部尚書朝議范成大使金請陵寢地良祐論不當遣恐生邊釁忤旨貶瑞州居住尋移信州

宋史弘簡錄

葉三省高宗時直龍圖閣憤秦檜誤國貽書趙鼎力排和議



之非檜恨之安置筠州府志

余古不知何許人自稱布衣因光宗以災異詔群臣言時政  
闕失古亦發憤上書極諫安置高安詣學教讀同上

袁州府

晉

習鑿齒字彥威襄陽人為桓溫別駕晉末秦苻堅寇襄陽鑿  
齒避地於萬載山谷誦讀不輟後人名其山為書堂山今  
分宜有習墓安志

唐

陶沔竹溪六逸之一游萬載之東北村愛其山水遂居焉卒  
後鄉人立廟祀之今子孫所居之地號陶家坊萬載縣志  
柳希玘蘇州刺史父渾刺袁州有治聲朱泚反聞渾名欲致

之因榜掠其子希玘避居萬載之西江遂家焉同上

湛賁宋長史茂之十二世孫家本毘陵後為宜春人初為州  
吏其妻與彭伉之妻兄弟也伉貞元間擢進士第親族往  
賀座皆名士獨飯賁於後閣妻數之曰男子不能自振勵  
顧困辱如此賁由是發憤力學一舉進士上第伉聞賁舉  
方跨驢赤板橋驚墮地時人語曰湛賁登第彭伉落驢唐

撫言

宋

陳瓘字瑩中沙縣人徽宗朝為左司諫遷右司員外權給事  
中與曾布議論不合遺書論其過失布怒出知泰州崇寧  
中除名竄袁州宣和間卒靖康初贈諫議大夫賜諡忠肅  
宋史弘簡錄



曹輔字載德南劍州人登進士第政和六年以通仕郎歷祕書省正字上疏諫微行竄郴州六年移袁州居一年召為校書郎歷官尚書左丞同知樞密院事謚忠達宜春縣志吳師古宜興人舉進士紹興初胡銓上書阻和議乞斬檜師古鋟木傳其書忤秦檜流袁州卒宋史弘簡錄知浹汾州人通春秋左傳好直言岳飛以賓禮待之飛下大理獄浹上書聲其冤流袁州明一統志

元

李稷字孟賓滕州人幼穎敏八歲能記誦經史從其父官袁州師夏鎮又從官鉛山師方回孫鎮與回孫皆名進士長於春秋稷兼得其傳泰定四年進士歷御史丞加榮祿大夫豫章書

鮑遇字干泗徽州人為西臺御史與歐陽原功友善元主以鐵木迭兒輔導東宮上書劾其不可不納遂乞休徙居萬載山中萬載縣志

臨江府

晉

羅含字君章耒陽人含父綏嘗宰新淦新淦人楊羨後為含州將引含為主簿含傲然不顧羨招致不已辭不獲而就焉及羨去職含送之到縣新淦人以舊宰之子咸致賂遺含難辭而受之及歸悉封置而去由是遠近推服晉書

宋

徐世亨字嘉會開封人景祐間守臨有善政時詔州郡立學世亨悉力營建以疾革遂家焉後累贈通議大夫林志



劉次莊長沙人殿中侍御史博洽淹貫詞翰絕倫元祐中謫居新淦築室東山寺前俯瞰清流自謂有濠梁間趣因號戲魚翁時稱為高師今縣東有高師湖以次莊得名同上王覲字明叟泰州如臯人第進士為右正言右司諫極論罷章惇蔡確韓縝張璪又劾竄呂惠卿紹聖初以寶文閣直學士知成都徙河陽貶少府少監又貶鼎州團練副使徽宗即位還故職知永興軍過闕留為工部侍郎遷御史中丞改翰林學士日食四月朔帝下詔責躬覲當制有惟德弗類未足以當天心之語宰相去之乃力請外以龍圖閣學士知潤州徙海州罷主管太平觀安置臨江軍卒紹興初追復龍圖閣學士宋史方信孺字孚若興化軍人以父崧卿蔭補番禺尉韓侂胄舉

恢復之謀諸將僨軍朝廷尋悔金人亦厭兵乃遣韓元覲來使而都督府亦遣壯士遺敵書皆莫能得其要領近臣薦信孺可使自蕭山丞召赴都假朝奉郎充樞密院叅謀通問於金至濠州金帥紇石烈子仁止於獄中要以五事信孺曰反俘歸幣可也縛送首謀於古無之稱藩割地則非臣子所忍言至汴見左丞相宗浩辯對不少訕授以報書還詔侍從兩省臺諫官議所以復命衆議還俘獲罪首謀增歲幣五萬遣信孺再往金人猶執初議信孺固執不許宗浩計窮密與定約復命再差抵汴宗浩變前說有誅戮禁錮語信孺不為動會蜀兵取散關金人益疑信孺還言敵所欲五事其五不敢言侂胄厲聲詰之信孺徐曰欲得太師頭耳侂胄大怒奪三秩臨江軍居住同上



許奇字彥國開封人以蔭補太醫院判建炎中孟太后如虔  
奇扈駕至新喻遂家焉所著有黃農隱緒 新喻縣志

王光祖字仲顯睢陽人祖粵建炎末守臨因家焉光祖孝友  
坦易喜讀書知衡陽受知部使者辟守昭潭丁內艱服闋  
擢知瓊州嘗病廣右鹽法不便光宗即位以光祖為都督  
提舉兩路鹽盡行公私便之卒於官 府志

伍弼字國正寧化人紹興間官御史知洪州時秦檜用事弼  
憤不能去力請致仕因占籍於新喻之鳳池蕭詵為作歸

休記 新喻縣志

胡思誠字達孝澶州人寓居清江知安豐軍時羣盜剽掠無  
禁思誠悉擒之淮西諸司上其事除知濠州自號溶溪居  
士著有溶溪集若干卷 林志

余彥忠號清心忠襄安道六世孫由邵武訪親至新喻遂家  
吟峰下恬淡樂善不慕榮名刻勸善錄行世謝尚書諤序  
之嘗自閩携匠開書市以利後學起鐵冶以利公家喻之  
紙戶蓋創於彥忠云 新喻縣志

趙孟濟字君用其先汴人寓居清江德祐中待次于家郡檄  
攝衛城邑未幾元兵攻城孟濟與總統丁應明閉譙門登  
樓椎鼓以張虛聲元兵越境去既而湖北潰兵與西勤王  
兵城南相持孟濟慨然入陣撫諭兩軍感泣解散以功授  
清江令明年元兵大至城陷死之初丁應明與孟濟同里  
没于陣孟濟白諸郡以聞官其二子 林志

任詔字子巖蜀人才猷清敏自為令歷部使所至有政績後  
退居清江築圃山岡扁曰盤園建堂曰高風有盤園集高



風錄 同上

元

楊士弘字伯謙其先襄城人元初萬戶仲明之孫以世官占籍清江少嗜學工樂府諸詩著有鑑池春草集及選唐音行於世 府志

字木魯翀字子翬鄧之順陽人父居謙辟掾江西以家自隨生翀贛江舟中金鳴者三人以為異翀稍長即勤學父歿家事漸落翀不恤而為學益力乃自順陽復往江西從新喻蕭克翁學克翁宋叅政燧之四世孫也隱居不仕學行為州里所敬嘗夜夢大鳥止其所居翼覆軒外舉家驚異出視之冲天而去明日翀至翀始名思温字伯和克翁為易今名字以夢故後復從京兆蕭欒游其學益宏欒以女

妻之大德十一年用薦者授襄陽縣儒學教諭歷監察御史卒追封南陽郡公諡文靖 豫章書

明

周恒字道成其先開封人宋淳熙間曾大父繪通判臨江因家焉恒聰敏嗜學通蒙古字書薦為東宮伴讀丁外艱歸元末兵變郡城陷恒倡義師復之大府上其功授千戶江西失守落職教授於鄉洪武初預編禮書成辭歸有樗隱集 林志

吉安府

吳

劉惇字子仁平原人遭亂避地客遊廬陵事孫輔以明天官達占數顯於南土每有水旱寇賊皆先時處期無不中者



輔異焉以為軍師軍中咸敬事之號曰神明建安中孫權在豫章時有星變以問惇惇曰災在丹陽權曰何如曰客勝主人到某日當得問是時邊鴻作亂卒如惇言惇於諸術皆善尤明太乙皆能推演其事窮盡要妙著書百餘篇名儒刁玄稱以為奇惇亦寶愛其術不以告人故世莫得而明也 三國吳志

唐

姚崇字元之陝州硤石人世傳崇父嘗宦蜀中崇從母留不去居永新縣北十里有臺曰聰明崇嘗舍其上其母墓今在縣治東舊學宮左崇歷官中書令諡文獻 豫章書

牛僧孺字思黯涇州人祖仕唐為幕職自交廣至郴衡間為山寇所掠惟僧孺母子獲存遂棲姚崇故址母訓之學母

終葬邑之西南禾川元和初第進士後官至中書侍郎敬宗立封奇章郡公卒諡文簡 豫章書

按郭子章云姚牛二公本傳並未序至吉州然一統志郡志俱詳載二母墓地不知何據考崇父懿為雋州都督永新非入蜀之路何以云崇母留不去僧孺貶循州長史徙衡汝此是僧孺事而志云其祖仕唐自交廣至郴衡當必有誤今姑存之傳疑可也

張德廣名欽青州人天復間授節度推官累功封開國男監永新官滿因家之卒葬勝業鄉之金鼇山 永新縣志

南唐

顏詡魯郡公真卿之後唐末徙居和川少孤事繼母以孝聞一門百口家法嚴肅子姪二十餘人皆被服儒業聞子弟



西江志 卷九十五  
中有與客戲者手寫韋昭博弈論署於屋壁使之自愧家人未嘗見其喜愠卒年七十餘

馬令南唐書

按宋史以詡為宋人今據南唐書再攷唐末詩人孟賓于寓居吉州玉笥山有題顏氏亭字七言絕句云園林瀟洒閒來久欲訪因循二十秋今日開襟吟不盡碧山重叠水長流蓋為詡作也詩見金鑿集中其為南唐人無疑

劉儼字漢臣為安福簿眷戀湖山之勝不忍去留家密湖卒

葬白馬峰

府志

孟賓于字國儀連州輔國鄉人天福中自湖湘越京洛應舉遠人無援遂卜命于華山神琰有如一年乞一琰凡六擲得吉天福九年登第果六舉後往江南官至水部郎中致

仕居吉州玉笥山自號羣玉峰叟

郡閣雅談

張翊其先世為京兆人唐末翊父授任番禺屬劉隱將據廣南棄官北還至潭衡間馬氏已有潭澧挈家奔江南過廬陵禾川僦屋居焉翊與弟惟彬善讀書克承先業高祖時徐知誥輔國政翊入廣陵以射策中第授武騎尉南唐禪代擢虔州觀察判官西昌令假道還廣陵里人榮之翊文辭婉麗禾山大舜二妃廟碑廬陵紫陽觀碑新興佛閣碑文皆翊所撰

十國春秋

宋

劉功甫會稽人寶祐中為萬安令有惠政後即居于邑之橫

街

府志

胡洪範環州人寄居吉水西城咸寧間星變以國學生應詔



上書詆賈似道專權誤國似道怒欲置之死丞相江萬里  
疏稱其無罪得釋歸卒 吉水縣志

路植河南人紹興間為安福令後遂家於邑之湖溪 府志

元

姜天祐字孝祥四川重慶人以父蔭補吉安路都稅使弟慶  
祥贅於仁壽鄉盧堯王氏遂家焉至正壬辰群盜蜂起與  
校書郎解子元大安羅啓南率眾拒寇遇敵敢勇與子元  
力戰而死太守立忠義祠以祀之 府志

李祁字一初茶陵人元末舉進士第二為遼陽儒學提舉元  
亡不復出寓居永新卒焉自號危行老人文章端雅有希  
蘧集若干卷 明一統志

明

單執禮順天宛平人洪武間以御史謫吉水丞卒寓縣之南  
坊 吉水縣志

王應雷字昭明崑山人受業於魏校篤好周禮謂周禮自宋  
以後各以己意更定然此皆諸儒之周禮也覃研十數載  
先求聖人之心溯斯禮之源次考天象之文原設官之意  
推五官離合之故見綱維統體之極成周禮傳詁數十卷  
嘉靖中家燬於兵流寓泰和以其書就正羅洪先洪先大  
服翰林陳積昌以師禮事之卒於泰和積昌為經紀其喪  
歸之崑山所著有經傳正譌同文備考書法指要六義音  
切貫珠圖六義相關圖等書行世 明史藁

王畿字汝中號龍溪浙江山陰人弱冠舉於鄉嘉靖癸未下  
第歸受業王文成守仁丙戌試期不欲往守仁曰吾非以



一第為子榮也顧吾之學疑信者半子之京師可以發明耳畿乃行中會試時當國者不說學故不廷試而歸戊子守仁卒於南安畿奔喪至廣信斬衰以畢葬事而後心喪壬辰授南京職方主事尋以病歸後遷至武選郎中在林下四十年無日不講學嘗與鄒文莊守益羅文恭洪先會講青原考德問業一時稱盛焉

明儒學案

錢德洪字洪甫號緒山浙江餘姚人王守仁平濠歸越德洪與同邑范引年管州等數十人會於天中閣同稟學焉嘉靖五年成進士守仁征思田德洪與王畿承守越中書院七年奔守仁喪至貴溪羣弟子議喪服德洪曰吾夫子歿於道路無主喪者弟子不可以無服然德洪有父母在麻衣布經弗敢有加焉築室於塲以終心喪十一年始廷試

出為蘇學教授歷遷刑部員外郎穆宗朝進階朝列大夫致仕戊申與王畿赴青原復古會後九年再至窮鄉邃谷田夫野老皆知有會莫不敬業而安之

同上

### 撫州府

吳

丁奉字承淵廬江安豐人仕吳為冠軍將軍封都亭侯計略過人能斷大事孫休時遷大將軍休薨奉與丞相濮陽興等迎立孫皓遷右大司馬左軍師有毀之者皓徙奉家於

臨川

明一統志

晉

郭翻字長翔武昌人伯父訥廣州刺史父察安城太守翻少有志操辭州郡辟及賢良之舉家于臨川不交世事惟以



西江志 卷九十五  
漁釣射獵為娛與翟湯俱為庾亮所薦公車博士徵不就  
咸康末乘小船暫歸武昌省墳墓安西將軍庾翼躬往造  
翻欲強起之翻曰人性各有所短焉可強逼翼又以其船  
小狹欲引就大船翻曰使君不以鄙賤而辱臨之此固野  
人之舟也翼俯屈入其舟中終日而去 晉書

南唐

賈崇少勇果俗謂之賈尉遲事烈祖積官至侍衛都虞候元  
宗嗣立擢神武統軍東都屯營使周師未及境盡焚其井  
邑棄壘而歸元宗責其奔潰之由且曰朝野謂卿為賈尉  
遲朕甚賴卿一旦敵兵未至弃甲宵遁何面目至此耶崇  
叩首言朱元既叛大軍失律城孤氣奪無數旅以禦要害  
雖真尉遲亦無所施其勇惟陛下裁之以忤旨釋罪長流

撫州

十國春秋

宋

韓駒字子蒼蜀陵陽人獻文論補將仕郎累官直學士院詔  
撰樂章坐蘇氏黨奉祠尋復應召歷知江州致仕寓居臨

川卒

林志

許忻字子禮拱州襄邑人寓臨川初擢第蔡京當國欲妻以  
女忻曰非偶也紹興間赴調趙鼎詢以世務條十弊以獻  
丐祠去尚書程瑀薦之召還時方議和忻極言不可後知  
邵州尊賢育才郡士嚮義及歸蕭然如昔閉戶讀書卒年

五十六

府志

薛公采字元亮汝州葉縣人幼穎敏嘗問其外伯祖草堂先  
生曰已聞讀書之方未識行已之要草堂為作十戒十勉



以示之嘗曰與其祿而蹈不測之機孰若舍危就安而寧  
吾親乎遂不仕潛心聖道作詩訓諸孫朱文公陸文安公  
皆為之跋呂成公贊其像曰今衣冠古風節室如冰衾似  
鐵佩所聞稚暨耄見汲公無愧色卒葬招仙山

林志

張澂字達明舒州人官至尚書右丞建炎南渡嘗宰臨川遂

寓居焉著有淡巖文集

臨川縣志

李璧字季章眉山人歷仕至叅知政事有詩文士論以其文

章伯仲葉水心詩詞輩行陸放翁晚遷於撫創峩峩峯書院

聚書藏於閣有臨汝閒書五十卷

府志

尹塽字致道和靖先生之後以恩補江西茶鹽幹官寓臨川

遂入籍焉仕至金州倅卒

同上

林文仲字次章祖公選本閩清人為瓊管安撫待次撫城因

家焉登淳熙二年進士授常德府司法累仕至成都漕政

卒子正嘉定進士

同上

孫覲晉陵人宣和六年以尚書員外郎叅詳貢舉被謫道臨

川寓居宜黃作興造遷學諸記

同上

元

虞汲本蜀仁壽人允文之後父珪知連州以文學知名汲仕

宋為黃岡尉宋亡僑居臨川崇仁與吳澄為友澄稱其文

清而醇家貧教授後以翰林院編修致仕

明一統志

章伯顏以左丞致仕居臨川平章政事道童討賊江西請署

行省左丞至則專任調遣設禦敵之計乘間出擊賊擣其

營走之伯顏之功為多未幾以疾卒

臨川縣志

明



李貞字世貞山東蒲臺人初以才學舉任大名主簿改樂安  
操執清慎上官重之委任磚窰于金雞城董役過勤卒于  
工次貧不能還遂占籍于明賢鄉

林志

陳迪宣城人祖宥賢以從征有功調撫州百戶因家焉迪以  
薦為郡學教授入翰林累官至禮部尚書太子太師靖難  
兵起督兵江上還宣城文皇既入召問迪謾罵不屈與子  
鳳山等同日死

臨川縣志

### 建昌府

宋

張安石字伯起父侑金陵人康定中宰南豐卒於官貧不克  
歸因家焉安石不治產業不畜妻子居無童僕寄爨隣家  
與人接貌不苟親言不苟從舉太學進士不第卒於京師

曾文昭肇時在館閣致其骨歸里銘其墓曰孔子不得中  
道而與之欲得不屑不潔之士若伯起者其近是歟

豫章書

王羲叔字夏卿鄭州人官至侍郎家南城紹興中行卒為亂  
有撫定之功旰民德之建祠以祀其後裔華鏃皆成進士

府志

吳潛字毅夫寧國人泰定十年進士第一紹定四年都城火  
疏論六事所言率驗知建康府兼行宮留守疏論保蜀之  
方護襄之策防江之算備海之宜甚難者三事端平初應  
詔復陳九事忤時相復起歷戶工吏三部尚書兼知臨安  
言皆嘉納淳祐十一年拜右丞相兼樞密使開慶初乞骸  
未幾拜特進左丞相先是元兵渡江賈似道在漢陽御史



饒應子請移之黃州黃雖下流實兵衝也似道以為潛欲殺已銜之令御史沈炎劾潛措置無方致全衡永桂皆破落職謫建昌軍

宋史弘簡錄

陳蒙 人咸淳間為太府寺主簿嘗入對極言似道為相國政闕失後為淮東總領似道誣以貪汙安置于建昌軍籍錄其家

綱目續編

謝堯仁字夢得建寧人徙居南豐卓絕奇詭有志當世而骯髒不自達寓情詩酒著有鹿峰嶺菴集子驛字處厚亦能詩與舍人張孝祥友善

府志

元

王伯昭其先恒山人寓居南城學贍才雄聲稱藉甚大江之右未能或之先也

宋潛溪恒山精舍記

按江西寓賢諸郡代不乏人獨建昌府則明一統志及林志安志府縣志乘俱缺豈僻在一隅名賢不樂依棲歟抑文獻無徵歷久而愈湮也今檢宋史續通鑑綱目與建昌人物傳中有應入流寓者採摭凡六人以補舊志缺略

西江志卷第九十五



西江志卷第九十六

寓賢二

廣信府

唐

閣立本西安萬年人官中書令卜居武安山下讀書暖水三山之左置南莊五都自太宗殂高宗立權移武后立本舍宅為普寧寺施讀書處為智門寺舍南莊為普圓禪院又築墓於普寧寺後委僧護守之

府志

陸羽字鴻漸一名疾字季疵復州竟陵人拜太子文學徒太常寺太祝不就寓居信城北三里自號東岡子性嗜茶環居多植茶因號茶山御史蕭瑜領洪州羽自信州移至洪州玉芝觀瑜喜與之唱和成帙權德輿為之序

豫章書



西江志 卷九十六  
呂安國其先鄂州人家歷城唐僖宗時為衢州刺史卒于官  
仲子珏扶櫬歸過信值黃巢兵亂奔永豐鎮得岑陽之勝  
因家焉府志

俞稠歙州人唐時授睦州刺史過信州愛永豐之瑜山遂徙  
家居其下同上

宋

楊億字大年建州浦城人祖文逸南唐玉山令億將生文逸  
夢一道士自稱懷玉山人來謁未幾億生七歲能屬文對  
客談有老成風太宗聞其名詔送闕下試詩賦五篇深加  
賞異即授秘書省正字歷官翰林學士兼史館修撰判館  
事權景靈宮副使卒所著藉蒼武夷穎陰韓城退居汝陽  
蓬山冠鰲等集內外制刀筆共一百九十四卷宋史

詹復仁字仲仁崇安人景祐間登進士第累官中憲大夫浙  
江副使金人犯闕遂奉親以歸徙居鉛山之永平橋東崇

義鄉府志

葉澣字雋齊元符進士授大理寺評事本浙江處州籍建炎  
初棄官隱弋陽縣南之遇春別號漁隱八子二十一孫壽  
九十四卒葬于河潭大理卿周三畏誌其墓同上

李彌大字似矩蘇州人崇寧進士履行端方為一時之傑累  
官至工部尚書後以顯謨閣學士致仕寓居于信之懷玉

山宋史新編

馬永卿字大年揚州人大觀進士退居于鉛山南溪撰論語  
解十卷易拾遺二卷懶真子錄二十卷集十五卷府志  
喻樗字子材嚴州人登進士為玉山尉拔汪端明於童子時



妻以女趙忠簡公薦於朝除正字後家玉山卒葬於北鄉  
喻村著有大學中庸論語解玉泉語錄同上

鄭望之字顯道彭城人徙居上饒少有文名靖康初再使金  
營累官至吏部侍郎以徽猷閣直學士致仕弟資之字深  
道亦居溪南仕至吏部侍郎明一統志

韓元吉字無咎開封人維之子仕至吏部尚書龍圖閣學士  
封潁川公嘗師尹焞得呂祖謙為壻師友淵源為諸儒所  
推重徙居上饒所居之前有澗水號南澗澗南有園築亭  
竹間號蒼筤與兄元隆俱登甲第卒葬城東所著有愚戇  
錄周易繫辭等書子琥字仲止號澗泉與趙奉泉同時有  
詩名稱二泉先生方虛谷詩上饒有二泉指此府志  
晁謙之字恭祖澶州人渡江親族離散極力收卹因居信州

仕宋官敷文閣直學士卒葬鉛山鵝湖子孫因家焉明一

統志

周聿字德元青州人徙居上饒紹興間召對陳經綸匡濟策  
稱旨累官刑戶部侍郎所著有春秋大義易說等書同上

趙不迂字留臣嘗創書樓于上饒兄不遜字茂嘉後改名不  
過登進士第為清湘令嘗立兼濟倉于鉛山天王寺府志

尹穡字少稷兗州人博學有文登孝宗朝進士累官殿中侍  
御史後遷至右諫議大夫紹興間僑居懷玉山以方名齋  
徙上饒溪南之太霞宮開軒種竹曾文清以友直名之林

志

劉進行浙江西安人乾道間宦于饒後解官過信州遂卜居  
於永豐之塘墀永豐縣志



西江志 卷九十六  
王洋字元渤東牟人仕至起居舍人僑居城之南池與曾文清幾嘗相倡和府志

周陞字仲固仕至湖南轉運判官徙居上饒扁所居曰尚論東萊呂舍人有詩同上

趙暘字羲若鄭州人世居東里直龍圖閣以提點坑冶鑄錢行提舉江州太平觀來居信州玉山智門寺時左丞相呂忠穆公頤浩以書抵信守連南夫曰趙羲若父子皆士林宿望治封有賢人君子可厚加禮待會羲若作亭施舜顯因摘君子字以名之同上

徐兢字明叔南唐騎省都尉鉉之裔仕至刑部郎中善書畫人物瀟洒有園在弋陽縣王洋為賦真意堂詩曾文清幾為賦蓮榭詩同上

王傳字巖起蓬萊人嘗居上饒赴淮東提舉呂東萊有贈行

詩林志

宋授字傳道號易齋世居青社徙信州後令豐城知永康權發遣柳州俱有政績府志

錢時字子是淳安人幼奇偉不群讀書不為世儒之習以易冠漕司既而絕意科舉究明理學江東提刑袁甫作象山書院招主講席學者興起政事多所裨益著有周易釋傳尚書演義學詩管見春秋大旨四書管見兩漢筆記蜀阜集冠昏記百行冠冕集宋史

賈逸祖字元放邯鄲人好古博學寓居鉛山天王寺有半隱齋陸務觀為之記卒葬東里趙蕃題之曰有宋詩人賈元放墓府志



元

篤列圖字彥誠蒙古人父揭南新字教化累功封忠武侯祥興間鎮信州路得一識云水打巷村園永豐出狀元遂家於永之進賢坊生篤列圖登至順庚午年蒙古榜進士第一授南臺御史

林志

馮廣字原禎上世開化人父曾應任永豐教諭廣隨任愛其

山水靈秀因卜居於學宮之南

府志

明

徐夢麟懷遠人父良弼洪武間任貴溪令歿于官夢麟遂占

籍貴溪領永樂戊子科鄉薦官鹽課司提舉

府志

饒州府

周

吳申夫差六世孫長沙王芮父事楚考烈王以諫封春申君

謫居番陽相傳生芮時五色雲見今餘干縣有五彩山

林志

晉

郭璞字景純河東聞喜人少受郭公青囊書九卷遂洞五行

天文卜筮之術元帝時為著作佐郎王敦謀逆被誅時年

四十九追贈弘農太守嘗寓鄱陽縣東一百十里有郭璞

山謨有洞林京費諸家要最新林卜韻注釋爾雅三蒼方

言穆天子傳山海經等書

府志

唐

歐陽詢潭州人唐太宗時拜太子率更令有一帖云年二十

餘至鄱陽縣喜其地沃土平眾士往往湊聚僑寓甚久

明



劉長卿字文房河間人開元進士至德中為監察御史以檢校祠部員外郎為轉運使判官知淮南鄂岳轉運留後鄂岳觀察使吳仲孺誣奏貶潘州南邑尉有為之辯者除睦州司馬終隨州刺史集十卷內有餘干夜宴歸弋陽山居登餘干古縣城與諸姪宴餘干後溪同姜濬題裴式微餘干東齋負謫後登干越亭諸詩

府志

盧綸字允言河中蒲人避天寶亂客鄱陽大曆初數舉進士不第元載取綸文以進補閩鄉尉累遷監察御史輒稱疾去坐與王縉善久不調渾瑊鎮河中辟元帥判官累遷檢校戶部郎中嘗朝京師是時舅韋渠牟得幸德宗表其才名見禁中有所作輒使賡和異日問渠牟盧綸李益何在

答曰綸從渾瑊在河中驛名之會卒

唐書

宋

葉似珪歙人皇祐間由文學舉歷官戶部郎以詩餞唐介有一封遠謫君恩重萬里遙瞻玉殿寒之句忤執政意黜尹建陽再黜為德興丞樂其風土之淳遂家焉

表君弘西江

詩話

顧臨字子敦會稽人通經學長於訓詁皇祐中舉說書科為國子監直講遷館閣校勘同知禮院熙寧初神宗以臨喜論兵詔編武經要略出權湖南轉運判官提舉常平議事戾執政意罷歸元祐二年擢給事中拜天章閣待制河北都轉運使歷刑兵吏三部侍郎兼侍讀為翰林學士紹聖初以龍圖閣學士知定州徙應天河南府忌者指為黨人



西江志 卷九十一 六  
斥饒州居住卒

宋史

蘇昞字季明武功人素性純茂強學篤志從張載學最久後

見二程復師事以卒其業元祐末呂大中以布衣薦為太

常博士坐元符中上書言事入邪籍編管饒州卒

宋史弘

簡錄

汪廷直字從正婺源人政和二年登第進屯田員外郎未拜

命卒寓居樂安龍亭尚書程瑀表其墓

府志

辛次膺字起季萊州人幼孤從母依外氏王聖美于丹徒俊

慧力學日誦千言甫冠登政和二年進士第歷官為單父

丞值山東亂舉室南渡寓居浮梁縣之最高山

同上

鄭戩其先大梁人父肇戶部侍郎從高宗南渡徙居金陵戩

官饒州通判因家焉明江淮幕府叅贊倫號環谷野人者

戩七世孫也

天台林右集

薛仁輔字汝弼河東人官大理少卿時秦檜構岳武穆獄仁

輔寃之不署奏牘且明飛無罪檜怒編管遇赦移饒因卜

居樂平之安巷今薛家塘即其遺址

林志

戴松字桂之弟檜字寬甫父稠理宗朝為饒州刺史因占籍

鄱陽松中童子科進士官正字檜未仕稠病革謂松曰爾

幸食祿王家念爾弟幼且賤所有田廬悉以畀之父歿松

以田宅遜弟檜弗受彼此交讓各棲別館事聞命有司建

禮遜坊以旌其義

安志

元

張翥字仲舉晉寧人其父為吏從征江南調饒州安仁縣典

史翥少時豪放不羈好蹴踘喜音樂父以為憂翥一旦翻



然易業閉門讀書受業於李存存家安仁江東大儒也翦  
從之游道德性命之說多所研究至元末傳巖薦為國子  
助教尋退居淮東會朝廷修遼金宋三史起為翰林國史  
編修官史成歷遷河南行省平章政事翰林院學士承旨  
致仕卒 元史

明

葉綬字叔章上虞人永樂九年綬祖砥知饒州府綬遂占籍  
鄱陽補郡學弟子負中江西鄉試授應州學正綬儀觀清  
癯學問該博尤善古篆 府志

吳璋字廷用蘇州吳江人年十一喪父依母陸氏以居永樂  
間詔選天下節婦之賢者籍送內宮教刺繡陸以年例當  
行宣德間靖王出之封國韶州後改饒州陸皆從璋棄家

往來二藩間屢啓求見不允母子不相知者二十五年璋  
哀痛誓必見母正統十二年冒死求見嗣封康王憐而許  
之入見母而母已病篤不能言矣璋徬徨無計焚香籲天  
剖股作糜母啖之遂醒母子抱持以泣王聞而益閔焉召  
賜金帛獎諭而遣之璋遂奉母去饒卒于路匍匐扶櫬歸  
葬先墓一時士大夫哀其志作吳孝子傳 同上

潘一諤字茹虛福建惠安人萬曆辛卯鄉薦官淮藩長史勤  
學好問即居宅為講學之所名里仁社故藩涵玉創菁莪  
書院以延禮之寓饒二十餘年卒於官年七十二著有日

錄講義 同上

南康府

漢



巖下老人不知何許人亦不詳其姓字武帝南巡狩過彭蠡  
詔舉逸民時老人龐眉皓髮處于巖下左右強以應詔老  
人曰堯仁如天孤雲自飛一水一石臣之樂也帝曰卿不  
願仕乎曰簪纓縉笏束身王朝其如舊山谿之雲何帝嘉  
其志禮而遣之 林志

隋

虞綽字士裕餘姚人煬帝時為學士父經宰建昌因家焉 府志

唐

司馬宅相字元陽河南人齊愍王之後隋召為學士唐遷太  
子洗馬子悌擢進士惇歷山陰令亦嘗僑居於此 同上  
黃鳳麟其先江夏人徙家建昌好學能文以德行稱舉進士

累遷侍御史比部員外郎著有文集十卷 明一統志

劉昝虛字全一彭城人任左春坊司經局校書郎調崇文館

嘗寓居建昌 林志

按昝虛本唐人林志誤載入隋據全唐詩傳昝虛江東  
人天寶時官夏縣令又裘君弘西江詩話云昝虛開元  
中舉宏詞累官崇文館校書與孟襄陽王江寧齊名所  
居桃源里刺史吳競高其行改為孝弟里以表之今桃  
源里屬靖安縣故昝虛又載靖安志

劉軻徐之沛縣人天寶之亂隱居廬山萬杉寺與隱士茅君  
游元和末登進士官殿中侍御史史館修撰終洛州刺史  
著有翼孟豢龍雜文等書 豫章書

楊於陵字達夫本太尉震之後年始六歲間關至江右長有



奇志十八擢進士節度使韓滉以女妻之滉居宰相於陵  
避親退廬建昌以文書自娛穆宗朝官終戶部尚書封弘  
農郡公以左僕射致仕卒年七十八謚貞孝

新唐書

符載字厚之蜀人有奇才隱居廬山五老峯下聚書萬卷不  
為章句學貞元中李吳觀察江西薦其才授奉禮郎為南  
昌軍副使繼辟西川韋臯掌書記澤潞郝士美叅謀歷協  
律郎監察御史元和中卒段文昌志其墓

豫章書

元集虛河南人貞元元和間避地來居廬山相辭澗白居易

訪之題其亭

廬山志

楊衡元和中詩人隱居廬山人有竊衡詩而登第者後衡及  
第見其人怒曰一一鶴聲飛上天之句尚在耶其人遜謝  
曰此句知兄甚惜不敢竊之衡筦爾曰猶可恕也

唐詩紀

事

胡份

豫章書  
作玠

不知何許人常隱廬山苦吟工詩與李騰友善

騰廉問江西弓旌不至

同上

何乾曜不知何許人仕為侍郎後挂冠隱廬山稱匡麓道人

卒葬鶴鳴峯之遷鶯谷

廬山志

徐凝睦州人元和中官至侍郎常居廬山題咏甚多

同上

五代

鄭元素華原人少習詩禮避亂南遊隱居廬山青牛谷高臥

四十餘年採薇食蕨絃歌自若構椽剪茅于舍後會集古

書至千餘卷

南唐書

史虛白字畏名山東人南游廬山以詩酒自娛元宗即位韓  
熙載薦之召見問為治之理虛白曰臣草野之人漁釣而



已邦國大計不敢預知因醉溺於殿陛元宗曰真處士也  
賜田遣還

南唐書

伍喬廬江人性嗜學以淮人無出已右者遂渡江居廬山國  
學一夕見人掌自牖隙入署讀易二字忽不見喬大嘆異  
輒取易讀之探索精微越數年應進士舉及試畫八卦賦  
霽後望鍾山詩榜出喬中第一仕至考功員外郎卒有集  
一卷行世

十國春秋

陳貺閩人性沉澹志操古朴而不苟于仕進一臥廬山三十  
年學者多師事焉元宗以幣聘之布裘鹿鞞進止閑肆因  
獻景陽臺懷古詩元宗稱善欲授以官貺辭不受賜粟帛  
遣歸舊隱卒年七十

南唐書

江為其先宋州人避亂建陽遂為建陽人遊廬山白鹿洞師

事處士陳貺居二十年有風人之體時金陵初復唐制以  
進士取人為有題白鹿寺詩云吟登蕭寺旃檀閣醉倚王  
家玳瑁筵元宗南遷駐于寺見其詩稱善久之為繇是肆  
傲自謂俯拾青紫乃詣金陵求舉屢黜於有司欲束書亡  
越會同謀者上變按得其狀伏罪

同上

孟貫字一之建安人少好學嘗遊廬山下居其下以禮義文  
章節儉為當時師範人稱孟夫子仕周為大夫

林志

宋

楊徽之字仲猷建州浦城人南唐時讀書廬山白鹿洞後仕  
宋為諫議大夫遷翰林學士拜禮部侍郎善吟咏太宗嘗  
選其詩十聯書於御屏故梁周翰詩云誰似金華楊處士  
十聯詩在御屏間景祐二年贈太子太師謚文莊祀白鹿



洞白鹿洞志

崩鰲宣城人家貧好學讀書白鹿洞為學精敏以文章稱太平興國五年進士官至殿中丞歸隱廬山與諸葛濤廬降號廬山三友同上

馮京字當世其先自河朔徙鄂有奇志因父調南康守與兄元隨侍至幽邃菴愛其幽絕僧仁監留止讀書未幾擢第今幽邃菴古松乃京手植也廬山紀事

明起不知何許人初為白鹿洞主掌教授學徒數百人時知江州周述上言學徒甚盛請賜九經使之肄習後遷蔡州

褒信縣簿林志

蘇庠字養直丹陽人喜賦咏精翰墨卜築廬山以琴書自娛與脩水李彭齊名世稱蘇李養直父伯固從東坡遊養直

屬玉雙飛水滿塘詞見賞於坡稱為吾家養直廬山紀事

崔嘉彥字子虛少有大志壯歲避地巴東三峽間道下吳越曾以耕戰策干故相趙忠簡會去相不果行自是絕迹匡山得西原菴故址築室居焉耕田種藥以自給年逾七十神明不衰朱子集

林擇之字用中閩人從朱子遊最久朱子守南康擇之來講學於白鹿洞白鹿洞志

薛漑右補闕登之後號書倉為南海書記秩滿入廬山築室居之扁曰薛處士山堂後起為諫議大夫未幾復歸山題舊隱壁曰重來閒院靜喜對故山青時服其文雅廬山紀事

周紫芝字少隱宣城人家貧力學年六十一始以廷對第三



西江志 卷九十六  
歷右司負外郎出知興國軍秩滿可祠隱廬山終焉興國志

謝之良字子基開封人避兵廬山慕周朱之風遂家焉事母克孝篤於友愛早領鄉貢以子登科遂棄舉業專心理學號後巖處士官至承議郎致仕賜緋魚袋累贈太師加封周國公著有綱常類監傳世林志

### 九江府

漢

司馬遷龍門人太史公談之子也耕牧河山之陽十歲誦古文二十而南遊登廬山觀禹疏九江史記

晉

高悝廣陵人少孤事母以孝聞年十三值歲饑悝菜蔬不饜

每致甘肥于母撫幼弟以友愛稱寓居江州刺史華軼辟為西曹書佐及軼敗悝藏匿軼子經年會赦乃出元帝嘉而宥之以為參軍至丹陽尹光祿大夫封建昌伯晉書

劉澄之字仲思彭城人漢楚元王之後妙善莊老旁通百氏初為府參軍性好佛理乃之廬山自託遠公遂于西林澗北別立禪坊養志安貧精研玄理劉裕旌其號曰遺民義熙六年卒豫章書

劉宋

宗炳字少文南陽涅陽人性至孝居喪過禮為鄉里所稱刺史殷仲堪桓玄並辟主簿舉秀才不就宋高祖辟為主簿不起問其故荅曰棲丘飲谷三十餘年高祖善其對妙善琴書精于言理每遊山水往輒忘歸乃下入廬山就釋慧



遠考尋文義兄臧為南平太守逼與俱還乃於江陵三湖  
立宅凡所遊履皆圖之于室謂人曰撫琴動操欲令衆山  
皆響元嘉二十四年卒時年六十九

南史

周邵字子南與南陽翟湯隱於廬山庾亮臨江州聞翟周之  
風束帶躡履而詣焉邵聞庾至轉避之亮復密往值邵彈  
鳥於林因前與語還便云此人可起即拔為鎮蠻護軍西  
陽太守其集載與邵書西陽一郡戶口差寔非履道真純  
何以鎮其流遁詢之朝野僉曰足下今具上表請足下臨  
之無讓

尋陽記

齊

宗測字敬微少文之孫少靜退不樂人間永明三年詔徵太  
子舍人不就欲遊名山乃寫祖少文所作向子平圖于壁

上長子賓官在都知父此旨便求祿還為南郡丞付以家  
事遂往廬山止祖少文舊宅魚復侯子響為江州厚遣贈  
遺測曰少有狂疾尋山採藥遠來至此量腹而進松朮度  
形而衣薜蘿淡然已足豈容當此橫施建武二年徵為司  
徒主簿不就卒

南史

梁

劉慧斐字宣文彭城人父元直淮南太守慧斐少博學能屬  
文起家梁安成王法曹行參軍嘗還都途經尋陽游於庄  
山遇處士張孝秀相得甚歡遂有終焉之志因不仕居東  
林寺又於山北構園一所號曰離垢園人稱離垢先生

豫

章書

張孝秀字文逸南陽人徙居尋陽為建安王別駕棄官入廬



山隱居東林寺側孝秀性通率不好浮華嘗冠縠皮巾躡蒲履手執并閭皮麈尾服寒食散盛冬臥於石上博涉群書專精釋典普通三年卒梁簡文甚傷悼焉與劉慧斐書述其貞白云廬山志

陳

張正見字見頤清河東武城人梁元帝立拜通直散騎侍郎遷彭澤令屬梁季喪亂避地于匡俗山時焦僧度擁衆自保遣使請交正見懼之遜辭延納然以禮法自持僧度亦雅相敬憚高祖受禪詔正見還都除鎮東鄱陽王府墨曹行叅軍兼衡陽王府長史歷宜都王限外記室撰史著士帶尋陽郡丞累遷尚書度支郎通直散騎侍郎著士如故太建中卒時年四十九有集十四卷

陳書

唐

李白字太白十歲通詩書賀知章稱為謫仙薦於玄宗召見金鑾論當世事奏誦一篇帝賜食親為調羹命供奉翰林祿山反轉側宿松匡廬間永王璘辟為府僚璘起兵逃還彭澤及璘敗當誅因嘗救郭子儀犯法至是子儀請解官以贖得長流夜郎赦還潯陽復坐事下獄會宋若思將兵往河南道尋陽釋其囚辟為叅謀未幾辭職依當塗令李陽冰悅謝家青山將終焉代宗立召為左拾遺已卒年六十餘

唐書弘簡錄

元結字次山河南人後魏常山王遵十五代孫少不羈十七乃折節向學天寶十二載舉進士天下兵興入猗玕洞始稱猗玕子後家瀼濱乃自稱浪士久之拜道州刺史進授



營管經略使加左金吾衛將軍卒年五十贈禮部侍郎唐書

李華字遐叔趙州贊皇人天寶十一載遷監察御史安祿山反上誅守之策皆留不報玄宗入蜀百官解竄華母在鄴欲間行輦母以逃為盜所得偽署鳳閣舍人賊平貶杭州司戶叅軍華自傷踐危亂不能完節又不能安親欲終養而母亡遂屏居江南上元中以左補闕司封負外郎召之華喟然曰烏有隳節危親欲荷天子寵乎稱疾不拜李峴領選江南表置幕府臥疾江州其送李侍御序有云方理舟潯陽追跡幽人雖病痼齒衰而神王顛顛之中齊榮辱一視聽是非哀樂無自入矣

豫章書

吳筠字貞節華州華陰人通經義美文辭舉進士不中性高

鯁不耐沈浮于時愛廬山之勝卜居於茲著廬山雲液泉賦大曆十三年卒弟子私謚曰宗元先生

同上

侯高字玄覽上谷人少為道士學黃老練氣保形之術居廬山號華陽居士與孟郊東野韓愈退之李勃濬之獨孤朗用晦李翱習之相往來汴州亂兵士殺留後陸長源東取劉逸淮乃作弔汴州文投之大川以訴貞元十五年李翱遇高於蘇州出其辭以示翱翱謂孟東野曰誠之至者必上通上帝聞之劉逸淮其將不久後數月逸淮竟死達撫為楚州起攝盱眙祭酒李公遜刺衢州請治信安其觀察浙東又宰于剡三縣皆有政不幸得心疾留其子狗兒於李翱家而歸廬山不到卒於江西

文苑英華

楊收字藏之馮翊人讀書廬山有道者謂之曰子貌可仙如



仕即至宰相能捨所事從吾游乎收時方覲進取謝不能  
道者遂去不見 圍余錄

蕭存字伯誠蕭穎士子仕為金部員外郎以惡裴延齡棄官  
歸廬山子東為邕南從事女嫁柳中庸韓文公愈少時為  
存所知其後愈自袁州入為祭酒經廬山過其居存諸子  
皆凋謝惟女在江州為尼愈題其舊堂曰中郎有女能傳  
業伯道無兒可保家偶到匡山曾住處幾行哀淚落煙霞  
廬山紀事

### 後五代

歐陽敷字華道鄧州南陽人後漢隱帝間為中書舍人繼秉  
天雄軍節鉞周太祖時為光祿大夫檢校尚書侍郎因兵  
亂避居九華山後又徙隱彭澤筠塘淳化間卒遂葬于其

地子暕登咸平進士歷官常侍以父墓在縣遂家焉 府志  
南唐

孫晟初名鳳又名忌密州人好學有文辭尤長於詩少為道  
士居廬山簡寂宮常畫唐詩人賈島像置于屋壁朝夕事  
之簡寂宮道士惡晟以為妖驅出之乃儒服北之趙魏謁  
唐莊宗於鎮州莊宗以晟為著作佐郎天成中奔吳為吳  
相後使於周世宗名問江南事不對殺之 豫章書

### 宋

宋庠字公序安州安陸人後徙開封之雍丘父杞嘗為九江  
掾與其妻鍾禱于廬阜鍾夢道士授以書曰以遺爾子視  
之小戴禮也已而庠生他日見許真君像即夢中見者庠  
天聖初舉進士開封試禮部皆第一歷官司空謚元獻 豫



劉廷式字得之齊州人娶瞽女既喪不復娶蘇軾深重之後

監太平觀遂老於廬山府志

張所青州人登進士歷官監察御史直言詆黃潛善責鳳州

團練副使江州安置宋史弘簡錄

柳勅字公渙其先河東人徙居廣信登元符進士任河南叅

軍時徽宗惑于靈素誅求百姓勅上疏不報歎曰主上崇

虛棄實宋道去矣吾既不能正君可負所學而羈縻爵祿

乎竟解組南旋道經湖口訪陶元亮故址遂卜居焉府志

王庶字子尚慶陽人以不主和議七疏乞免乃以資政殿學

士知潭州歸至九江被命奪職徙家居焉同上

李若谷河北人高宗時罷叅政或曰胡不效楊原仲之泣若

谷笑曰即捶死淚亦不出秦檜聞之大怒謫居江州林志

元

黃澤字楚望資州人父儀可累舉不第隨兄驥子官九江蜀

亂不能歸因家焉澤生有異質慨然以明經學道為志作

易春秋二經解大德中江西行省相臣聞其名授江州景

星書院山長懼學者得於創聞不復致思乃作易學濫觴

春秋指要示人以求端用力之方吳澄嘗觀其書以為平

生所見明經士未有能及之者元史

黃德隆山東人江州萬戶管軍尚節概元末城陷與總管李

黼同死子孫因世居於高良山林志

明

趙汭字子常休寧人姿稟卓絕初讀朱子四書多所疑難乃



盡取朱子書讀之聞九江黃澤有學行往從之游澤之學以精思自悟為主其教人引而不發沔一再登門乃得六經疑義千餘條以歸已復往留二歲得口授六十四卦大義與學春秋之要後復從臨川虞集游聞吳澄之學乃築東山精舍讀書著述其中學者稱東山先生

明史

桑喬字子木揚州人爲御史嘉靖辛酉謫九江居廬山北林隱菴凡諸名勝無不歷覽所著有廬山紀事

豫章書

邢懋學黃梅人進士懋敬之弟遷居九江博學高才舉孝廉不願計偕創長松館延紫柏大師與江中明林半偈侄士俊等效遠公淨業故事歸宗寺賴以復興

府志

陳昂字爾瞻莆田人隆萬間避倭難攜妻子客南昌旋愛匡廬旅於九江琵琶亭側以織草履爲業得錢輒沽酒間或

爲人卜凡匡廬幽險處莫不登覽後卒於金陵有白雲先生詩集

同上

王一翥字子雲黃岡人中舉後隱居德化之吳障山茅屋三間蕭條高寄博學逸才詩文皆有天然之趣子材而夭即埋山下倣延陵季子之風人呼爲楚狂士

同上

南安府

宋

程顥字伯淳頤字正叔河南人父珦宋仁宗慶曆甲申知興國縣事越二年丙戌通判南安軍時周敦頤任司理叅軍因與爲友令二子師事之每令尋孔顏樂處宋史傳稱顥自十五六時與弟頤聞汝南周敦頤論學遂厭科舉之習慨然有志求道顥仕至太子中允監察御史裏行後謫汝



州監稅哲宗召爲宗正丞未行而卒年五十四文彥博題其墓曰明道先生嘉定間謚曰純公頤官至秘書省校書郎卒年七十五學者稱伊川先生謚曰正公

豫章書

江公望字民表睦州人舉進士建中靖國元年由太常博士拜左司諫內苑畜珍禽異獸力言非初政所宜蔡正仙府史以語言疑似成獄公望極言論救出知淮陽軍未幾召爲左司員外郎以直龍圖閣知壽州蔡京爲政編管南安軍遇赦還家建炎中贈右諫議大夫

宋史

張九成字子韶其先開封人徙居錢塘趙鼎薦爲太常博士改著作郎除宗正少卿權禮部侍郎秦檜主和議九成上陳十事檜惡其立異謫守邵州檜黨何鑄劾以傾附趙鼎詹大方復論與僧宗杲謗訕朝政謫居南安軍十四年益

勤問學每執書就明倚立庭甑歲久雙趺隱然檜死起知温州丐祠歸卒寶慶初贈太師崇國公謚文忠

宋史弘簡

錄

解潛藍田人爲邊帥以中丞李文會言其本趙鼎客不從和議謫居南安凡十九年疾革張九成往視之潛泣曰生平仗忠義誓與鹵死爲秦檜所斥此心惟天知之九成曰無愧此心足矣何必人知即豁然而逝

明一統志

鄭公憶紹興間由資政殿學士謫居南安

府志

劉黻字聲伯温州樂清人淳祐中丁大全劾奏丞相董槐去國將奪其位時黻爲太學生伏闕上書忤執政送南安軍安置歸別其母母曰爲臣死忠以直被貶分也速行黻至南安盡取濂洛諸書摘其精要語輯成書十卷名曰濂洛



論語及大全貶黜還太學累官至試吏部尚書以丁艱歸  
久不起及文天祥勤王徵之慨然赴難尋以疾卒始終大  
節卓然著有蒙川集問梅集及詩銘若干卷傳於世 同上

明

陳獻章字公甫新會人舉正統十二年鄉試再上禮部不第  
從吳與弼講學居半載乃歸廣東布政使彭韶總督朱英  
交薦召至京令就試吏部辭疾不赴疏乞終養授翰林院  
檢討以歸至南安與知府張弼日相賡和弼疑其拜官與  
與弼不同對曰吳先生以布衣為石亨所薦故不受職獻  
章以聽選國子生疏陳始終願仕故不敢偽辭釣虛譽自  
是屢薦卒不起萬曆初從祀孔廟追諡文恭 明史藁

贛州府

唐

張說字道濟洛陽人長安中為鳳閣舍人張易之誣陷魏元  
忠援說為助說廷對元忠無不順言忤武后旨謫嶺南留

虔地寓紫極宮撰有碑文

贛府新志

李嶠字巨山贊皇人舉制策甲科封趙國公特進同中書門  
下三品中宗崩嶠嘗密請相王諸子不宜留京師及玄宗  
嗣位獲其表宮中張說言嶠誠憎逆順然為當時謀吠非  
其主不可追罪天子亦顧數更赦遂免聽隨子虔州刺史  
暢之官嶠富才思為文章宿老一時學者取法焉 唐書

宋

包拯字希仁合肥人過 師事邑人陳晦之於崆峒山中 贛

縣志



蘇洵字明允眉山人嘗南遊入虔與贛人鍾棊交洵不喜飲酒每為設醴其後洵子軾轍過虔必造訪棊又與棊子志仁志行志遠敦通家之好云謝志

呂倚字夢得維揚人少有聲場屋善屬對好收古今帖踰躐不偶老始以恩補瑞金簿致仕貧無以歸年八十餘惟一女嫁贛人因居焉與王禹玉有舊元豐間餉錢二萬酒十壺倚作啓致謝隔句中用白水真人青州從事為對禹玉極歎賞之東坡過虔遺之以詩潘子真詩話

楊方字子直長汀人隆興初登第嘗遊崇安謁朱子面受教旨後除編修官祕書郎時禁偽學坐朱子黨罷僑居贛州閉門讀書自號淡軒嘉定初召起累官直寶謨閣廣西提刑卒於象州宋時建祠與東坡並祀今廢謝志

元

滕賓字玉霄睢陽人仁宗英宗間官翰林嘗客遊興國至治辛酉為監邑忽都必誤拯粥碑記又有題令公巖十景詩見袁天麒舊志歙水志林

明

丘濬字仲深瓊山人屢駐鬱孤臺歷游勝境題詠甚多天啓間贛令丘爾懿即其冢孫贛縣志

國朝

吳參字竟魯貴池人父尊周崇禎末武進士遯跡為頭陀或傳其在南嶽參往省未得見南昌彭士望與尊周有舊參喪偶子正名纔數齡托士望鞠之乃變姓名為姬適訪求幾半天下終不得遇乃從士望於寧都躬耕冠石以父出



亡終身不再娶有志理學著裏言一編晚之杭越與河渚  
三君子應嗣寅沈甸華陳際叔交相與共談學乙卯卒於  
杭河渚諸子爲具含殮而正名遂家寧都以文學爲李騰  
蛟魏禮高坐弟子

贛府新志

俞塞字吾體歙縣人少讀書講道不應舉鄉邦以學行宗之  
崇禎末棄家出遊抵石城住東門城樓戍卒憎其哦詩聲  
却之乃僦居山寺董令應譽聞而賓禮之留之不可餽以  
金弗受惟詩文往還邑中人士多就教者後入閩海不知

所終

石城縣志

鮑夔生字子韶歙縣人父叔裔崇禎末以孝廉令廣之始興  
遭亂棄官避地贛縣夔生少從父兵間嫺兵畧意氣豪上  
所論交皆當世知名士縱游吳越燕齊間丁巳從某都督

征吉安戊午從尚將軍之孝勦厓石及平閩汀諸賊壘後  
先以儒服借箸軍門或談言微中脫善類於阨士論歸之  
卒子孫屬籍於贛

贛府新志

柴紹炳字虎臣號省軒浙江仁和人少奇敏博學工詩中年  
潛心關閩濂洛之學嘗從父任過寧都與曾燦魏禧兄弟  
遊講學易堂以躬行實踐爲歸結廬白茅峯有終焉之志  
後以父卒官扶櫬歸里

仁和縣志







